




غبط العنب ١٨٨٢




غيط الغناب ١٨٨٢
مهدى بندق



المكتبة الوطنية الفلسطينية للكتاب

١٩٨٥



الشخصيات

- ١ - آسيا : مالكة غيط العنب - أرملة عثمان القمحاوى ٣٨ سنة
- ٢ - المغنواوى : قريبها العجوز - يقوم على خدمتها
- ٣ - راجى : ابن عثمان القمحاوى - ٢٣ سنة
- ٤ - الشيخ سليمان : صديق راجى - مدرس بالمعهد الدينى - من العربيين
- ٥ - المتناوى : تربي ، به شىء شبيهة بالمس
- ٦ - زاهية : أم يوسف حجازى القمحاوى
- ٧ - عيشة : زوجة يوسف - ٢٢ سنة
- ٨ - يوسف : ابن عم راجى - صاحب حنطور - من العربيين
٢٤ سنة
- ٩ - سيد العجبان : عربجى حنطور وصديق يوسف

- ١٠ - فهيمة : ابنة القمحاوى وشقيقة حجازى وعثمان - عانس
- ١١ - البروفسير : مدرس عجوز فرنسى وعاشق للحضارة المصرية
- ١٢ - عزيزة : ابنة دسوقى القمحاوى - ٢٣ سنة
- ١٣ - دسوقى : الابن الأوسط لعثمان القمحاوى - أرمل فى العقد الخامس .
- ١٤ - جون فونينه : عميد الجالية السويسرية بالاسكندرية
- ١٥ - عمر لطفى : محافظ الاسكندرية
- ١٦ - ضابط بوليس :
- ١٧ - عسكري بوليس :
- ١٨ - المالى : خواجه شرس كان يوسف قد ضربه علقه
- ١٩ - جويده : اعرابى من أتباع الخديوى توفيق وأهالى ، وأجانب وعربان

تقع أحداث المسرحية فى الفترة من أول يونيو الى ١١
يونيو ١٨٨٢

الفصل الأول

المنظر الأول

غرفة المعيشة بمنزل الست آسيا مالكة غيط العنب .
الغرفة يبدو عليها طابع الثراء الريفى مصابة برائحة البخور الذى يفوح
من مجمر معلقة على الحائط .

المغنواتى - وهو عجوز قائم على خدمة قريبتها الست آسيا - منشغل
باعداد « الطليلة » المطعمة بالصدف ، يرتب « الشلت » والمساند
النظيفة على الأرائك وعلى الأرض ويعيد ترتيبها أكثر من مرة بينما هو
يدندن بصوت خافت جدا ولهذا فهو لا يلتفت لنداء آسيا .

آسيا : (من الداخل) يا مغنواتى .. يا مغنواتى

المغنواتى : يا صوانى .. دورى دورى

يا صوانى الحنة

شعر الحلوة يا عصفورى

ريحته .. من الحنة

يا صوانى .. دورى دورى

يا صواني الوردى

خد الحلوة يا عصفورى

بيسلم على خدى

آسيا : (داخله فى حالة غضب) يا مغنواتى يا أطرش

(حين يراها الرجل يكتنم فمه مذعورا)

آسيا : انت واقف مبلم كده ليه ؟ الولد زمانه صحى • حط هنا شلتنين

المغنواتى : (متوددا اليها) بيقولوا فى بلاد بره بياكلوا على كراسى

آسيا : (بجفاء) ياللا ياللا •• حضر انت الفطار عقبال ما اصحيه •

كفاياه نوم •• (ولنفسها) نفسى أشوفه قاعد على الشلثة
قعدة أبوه •• ياللا اتحرك ياراجل

المغنواتى : حاضر

آسيا : استنى •• انت عارف حتعمل ايه ؟

المغنواتى : العسل بالقشطة ، والشاى باللبن ، وست بيضات مقليين
وال ••• وال ••• والجينة التركى •• صح ؟

آسيا : (فى غل) وابقى انسى نفسك واقرا لك شوية فى جورنال
النديم بتاعكم

المغنواتى : (بهجة) بيقولوا عرابى حيشيل افندينا خلاص •

آسيا : (تهجم عليه) انت حتعمل لى فيها سياسى على آخر الزمان

المغنواتي : (هاربا) ما هو لو شاله .. يبقى احنا حنقب على وش الدنيا .

آسيا : (تصيح فيه بغيظ شديد) نعم يا خويا ؟ ما انتم قابين وكويسين كده .. طامعين في ايه تاني ؟! نسيتم نفسكم كنتم ايه في الصعيد نسيتم أنا عملت لكم ايه ؟ ! بيوت ، وسكنتكم .. عيالكم وآديني مشغلاهم في أرضي .. كل ده ولسه عاوزين تقبوا ؟ ايه ؟!

المغنواتي : طيب طيب .. الله ؟

(ويخرج مرددا) دى ما كنتش كلمة !! ولية ما بتفكرش الا في روحها .. أعوذ بالله من دى قرابة

آسيا : انت بتبرطم بتقول ايه ؟ أقف كلمني (لكنه كان قد خرج في نفس الوقت الذي دخل فيه الابن راجي ، يدلك عينيه متثابرا بشدة فتقترب منه آسيا وهي تكتم سرورها برؤيته) انت صحيت يا راجي ؟

(ولنفسها) ماشاء الله ماشاء الله ربنا يحميك من عينين الحساد (وتأخذ الحجرة تمررها فوق رأسه بمنتهى الجدية)

الأولة بسم الله .. والثانية بسم الله .. والثالثة بسم الله

(تلاحظ ضيق الفتى بالدخان) والخامسة والسادسة بسم الله ..

والسابعة رقوة سيدنا محمد بن عبد اللا

(وتصيح في وجه فجأة) انت نمت تاني يا راجي ؟

راجي : (وهو يتشاءب) خلاص ؟

آسيا : حالا ٠٠ الفطار زمانه جاي

راجي : أنا نمت كثير ؟

آسيا : نوم العوافي (واذ تلاحظ أنها ترق قليلا تستعيد جهامتها
وتصيح) يا مغنواتي ٠٠ الفطار يا مغنواتي ٠٠ انت يا أطرش

المغنواتي : (من الداخل بصوت أوبرالي) حالا يا ست آسيا

راجي : (مفزوعا) كل ده صوت ؟

آسيا : (في غل متزايد) بقي رجله والقبر وصوته هوه هوه ٠٠
الهي ينشك في صوته

راجي : بس أظن ما عادش يعني زى زمان ؟

آسيا : يقدر ؟! وهوه بعد الي جرى لابوك يستجري يعني ؟! ده
أنا كنت أرميه في التربة هوه وعياله ٠٠ (وبجسرة) عيني
عليا ٠٠ راح وسابني لوحدي

راجي : نينة ٠٠ يعني أرجع أسافر تاني ؟

آسيا : لا ياخويا ٠٠ خلاص ٠٠ ماتخافش ٠٠ آديني انكتمت (يدخل
المغنواتي حاملا صينية الافطار)

راجي : (بمحبة) صباح الخير ياعم مغنواتي ياأمير

المغنواتي : (منشرحا) صباح النور على عيونك الحلوين ياسي
راجي ٠٠ اتفضل الفطار بالهنا والشفاه

(ويضع الصينية متراجعا للوراء)

راجي : ايه ٠٠ انت مش حتفطر معانا ؟

(آسيا تنظر الى المغنواتى متوعة فيترجع أكثر)

المغنواتى : لا .. أنا فطرت مع العيال قبل ما آجى .. كل انت
بالهنا والشفأ

آسيا : (وهى تحلق فى المغنواتى) وأنا كمان فطرت من الصبح
راجى : ايه ده ؟ أمال جايين الأكل ده كله ليه ؟

آسيا : علشانك انت لوحذك . كل حاجة فى البيت ده علشانك
انت لوحذك .. انت فاهم ؟ (تقولها وهى تنظر للمغنواتى)

المغنواتى : كل ياسى راجى . بالهنا والشفأ (يقولها وهو ينظر
لآسيا بفهم)

راجى : طب سيبينى آكل براحتى

آسيا : براحتك ياخويا .. ده انت نورت بيت امك .. وانا ايه
الى صبرنى على بعدك أربع سنين بحالهم . شش خوفى عليك من
الى ما يتسموش .. واللى يتسموا (يخرج المغنواتى) (راجى
ياكل بلا حماس)

آسيا : مالك ؟ ساكت ليه ؟

راجى : ما انتى كل شوية تجيبى سيرة الى حصل

آسيا : وهو الى حصل يتنسى يا وله ؟

راجى : الى حصل ده ما كنش مقصود .. وانتى عارفة أنه ما كنش
قاصد يقتله

آسيا : أمال كان جاي وراه من آخر الدنيا ليه ؟ علشان يبوسه
من خده ؟!

راجى : عركة ٠٠ عركة والشر زودها (وبتردد) وما تنسيش
برضه انه كان بيدور على حقه ٠٠ أصل عمى حجازى ده ٠٠٠

آسيا : (تكاد تجن) عمك ؟ قتال القتلة تقول عليه عمك ؟ عمك ؟
الى قتل ابوك فى عز شبابى ؟ وقدرت تقول عليه عمك ؟

راجى : مش خد جزاءه خلاص

آسيا : جزاءه ؟ ده لسه عايش ! لسه عايش ! خد خمستاشر سنة !
وايه يعنى ؟ آهو بكره يطلع لحضن مراته ٠٠ الولية الى
اسمها داهية ٠٠ داهية تاخدها

راجى : (يحاول أن يضحك) زاهية يا نينة ٠٠ مش داهية

آسيا : (بعنف) ما آخدش اعدام ليه ؟ ما تقوللى يا خويا يابتاع
القانون ٠٠ ما آخدش اعدام ليه ؟

راجى : القانون كده ٠ ما كانش فيه تربص ولا تعمد ٠ ده حتى
أخد أقصى عقوبة

آسيا : عقوبة ؟! الهى وانت جاهى توقع على دماغه جبل الطور
حجازى ابن زنوبة قبل ما يطلع ويشوف الدنيا

(وتلفتت اليه بدهشة مفاجئة) انت كنت بتقول بيدور على
حقه ؟!

راجى : مش برضه كان له فى فلوس جدى ؟

آسيا : (تصرخ) طب ما أخذوا حقهم ٠٠ اشمعنى عمك الزفت
دسوقى رضى بما قسم ٠

راجى : ما هو كمان عمى دسوقى ما قدرش يشتري غير خمس
فدادين .. انما أبويا اشتري غيط العنب بحاله ، فازاى ده
حصل ؟

آسيا : (فى شبه هستيريا) أبوك ما اشتراش حاجة .. ولو كان
على أبوك كانت الفلوس اتوزعت على اللى ايديهم سايبة ..
أنا اللى خليته يشتري غيط العنب باسمى .. يبقى الغيط
ده بتاع مين ؟ بتاعى أنا .. ملكى أنا .. وانت حتورثه بعد .

(ويتحشرج صوتها) بعد ما أموت .

راجى : أيوه .. بس الفلوس اللى اشتريتى بيها الغيط أعمامى كان
لهم فيها .

آسيا : أبوك عرض عليهم حقهم .. واحد رضى والثانى مارضيش ..
قتله المجرم ، وكان عاوز يقتلك انت كمان .

(وبحدة مفاجئة) انت ما بتاكلش ليه ؟ انت عاوز تموت ؟
ما تقوللى يا خويا اذا كنت عاوز تموت انت كمان زى أبوك
الى سابنى لوحدى (وتجهش بالبكاء الا أنها توقف الحالة
البكاية فجأة ملتفتة اليه بحدة) انما مين اللى قال لك على
الكلام ده كله ؟

راجى : عمى دسوقى .

آسيا : يعنى رحى له تانى ياسى راجى .. أنا مش محرجة عليك

راجى : كنت فايت من جنب ترعة الفرخة قمت قابله صدفة ..
ده راجل طيب قوى والله يا نينة .. وعمتى فهيمة كمان دماها
خفيف قوى .

آسيا : قطعت عمّتك سخيمة وقطع عمك دسوقي في ساعة واحدة .

راجي : (مستمرا) وكمان عزيزة نفسها تشوفك .

آسيا : بقى نفسها تشوفنى ولا نفسها تتلايم على الغيط ؟

راجي : (بهدوء حازم) اسمعى بقى يا نينة . اذا كنتى عاوزانى
أقعده هنا على طول وما أرجعشى أسافر تانى ...

آسيا : نعم ؟ عاوز ايه ؟ قولها ولا يهكم يا وله .

راجي : أيوه حا اقولها ..

آسيا : أنا ما حدش يحط لى العقدة فى المنشار .

(وتحلق فيه ثم تقول بلهجة تنذر بالشر) أنا مش قلت لك
ان يوسف ابن حجازى المجرم كان عاوز يخطبها ؟

راجي : وأبوها ما وافقش .

آسيا : يعنى عاوز تتجوز واحدة عمها قتل أبوك ، وابنه يبقى ابن
عمها ؟

راجي : (مندهشا) ابنه يبقى ابن عمها ؟ ! طب ما أنا برضه ابن
عمها .. انت ناسية ان احنا كلنا ولاد القمحاوى الكبير .

آسيا : (صارخة) قطع .. قطع القمحاوى واسمه .

راجي : بتدعى عليا يا نينة !؟

آسيا : لا .. انت لا .

راجي : مش أنا برضه راجي عثمان القمحاوى ؟

آسيا : لا .. انت ابني أنا .

راجی : (یقفز ملسوعا) ایه ؟! تقصیدی ایه بالكلام ده ؟

آسیا : أبوك ماله بیک ۰۰ أبوك رماك فی بطنی وراح مدينی ضهره
وهات یا شخیر ۰ أنا الی جبلت وولدت ورضعت وكبرت
وسفرت ۰

راجی : (متنفسا الصعداء) یا شیخة ۰۰۰

آسیا : وجای دلوقت تقولی أنا ابن القمحاوی ؟ وکمان عاوزنی
أجوزك بنت الراجل الی شمتان فی أبوك ؟

راجی : شمتان ازای بس ؟ ده اذا كان مارضیش یجوز بنته لابن
حجازی عشان عملة أبوه السوده ۰

آسیا : عشان عملة أبوه السوده ولا عشان ما هو عربجی حنطور
مش لاقی اللفی ۰

راجی : لا ۰۰ عشان عملة أبوه السوده ۰۰ هو نفسه قال كده

آسیا : (بتوتر) هو قال كنه ؟ ۰

راجی : (وهو یعلم انه یكذب) آی والله یا نینه ۰۰ صدقینی ۰

آسیا : (لم تصدق فتراجعت فورا) أبدا ۰۰ ده راجل العبان عاوز
یسلق لك البت ۰۰ ما هو مش لاقی حد یرضی بیها غیر ابن
حجازی المجرم ۰۰ وآهو راخر اتجوز بقی له سنة ۰۰ أنا
یا بنی مستعدیه أخطب بنت عمر باشا لطفی ذات نفسه بس
بلاش عزیزة دی ۰

راجی : (یعناد) بس أنا باحب عزیزة دی ۰ ومش ناوی اتجوز
غیرها ۰

آسيا : (تمصص شفيتها) بتجها ؟ طب لما جات لك قبل أنت
ما تسافر بحجة تستاف منك كتب ، ما سالتش فيها إيه
يا ضنايا ؟

واجي : (بدهشة) يعنى هيه كانت تقصد تقول ...

آسيا : حكم .. مش باقول لك انك لسه أهبل زى أبوك .

(وتنظر اليه بنفوس) يبقى امتى بقى حبيتها .. فى الحلم ولا
بالمراسلة ؟ ولا عاوز تعاندنى والسلام .

واجي : أبدا يا نينة . بس أنا لازم اتجوز واحدة متعلمة علشان
تفهمنى .

آسيا : طب ما كانوا عندك فى فرنسا أكثر من الهم على القلب .

واجي : أيوه بس دول بيعملوا حاجات مش ولا بد يا نينة .

آسيا : طيب والمحروسة ما هي عمك الندل سايبها دايرة على حل
شعرها .

واجي : يا نينة حرام عليكى .. دى بتعلم البنات .. وده عمل
تقدمى .

آسيا : تقدمك ؟ ! طب لما كانت فى مدرسة اليهود قالوا حيتلوها
تعلم البرنسياسة فى السرايات .. تقوم آخرتها تشتغل فى
فى ال ... فى الايه ؟ قلت لى فى الايه يا خويا ؟

واجي : فى الجمعية الخيرية .

آسيا : وتطلع أيه بقى الخيرية دى يا ما شا الله ؟ تطلع أيه يا ولاد
القماوى .

راجى : (نغد صبره) يا نينة تطلع زى ما تطلع . أنا أول ما أخطبها
حتقعد فى البيت على طول .

آسيا : يا بنى دى عقلها طاقق زى عمتها المجنونة . دول . . دول
بيقولوا عليها كمان انها . . . انها بتكلم الرجالة فى المدرسة .

راجى : لا يا نينة . . ما حصلتش للدرجة دى .

آسيا : وما تحصلش ليه ؟ مش النديم بيلم النسوان ويقعد يخطب
لهم .

راجى : كل ده حينتهى قريب . بس عرابى يصطليح مع الحديوى
والأمور تهدأ (يدخل المغنواتى ومعه شاب أزهرى معمم) .

المغنواتى : اتفضل يا مولانا اتفضل .

راجى : (ناهضا) أهلا شيخ سليمان .

سليمان : (مقبلا إياه) بونجورنو . . كيف حالك أيها الحسييس
المحبوب ؟ شهر بحاله من يوم ما رجعت ولا نراك غير مرة
واحدة (وملتفتا الى آسيا) ألم تشبعى بعد من غلامك هذا
فتتركيه لنا قليلا يا ست أم راجى ؟

آسيا : أشبع منه ؟ أشبع منه ازاي يا خويا ؟ دول أربع سنين
بحالهم .

راجى : ياللا بسم الله .

سليمان : (ناظرا الى الطعام) ولو أننى أفطرت فطورا دسما ، انما
مافيش ما يمنع .

آسيا : (للمغنواتى) قوام اعمل أربع بيضات تانيين واعمل شاي
كمان .

سليمان : وسقسقهم فى السمن البلدى يا أسطى .

آسيا : أيوه والنبي كل معاه .. افتح نفسه ده قاعده من الصبح
يتفرج على الأكل (وهي تخرج) اما استعجل لكم المغنواتي
أحسن ينام على روجه زى هوايده .

سليمان : مالك تبتسم لنفسك هكذا دون مبرر ؟ فيه أيه ؟
واجي : أنا مبسوط .. مبسوط قوى يا شيخ سليمان .. عندي
لك خبر هایل .

سليمان : (يقفز) خبر هایل ؟! يبقى الخديوى تراجع .. أنا قلت
هذا من الأول . طبعا لازم يتراجع . ضباط جراكسة عملوا
انقلاب على عرابي ناظر الحربية الشرعى . وحوكموا أمام
مجلس عسكري شرعى .. بقيادة فريق جركسى ...

واجي : (مقاطعا ضاحكا) برضه شرعى .

سليمان : أى نعم .. فلماذا يركب رأسه هذا الخديوى الملعون
ويرفض التصديق على الأحكام ؟ احراجا للبشارودى حتى
يستقيل ومعه عرابي ؟ يا أخى ده بعده .. هوه الى لازم
يمشى ، ولا يقعد والجزمة فوق دماغ الى خلفوه .. الآن فيه
دستور .. فيه قانون .

واجي : (مترددا) طب والنتيجة يا سليمان ؟ مش التصعيد ده
الى بين السرايا والوزارة هوه الى خلى أساطيل انجلترا
وفرنسا تيجي لحد اسكندرية ؟ طب أهم مقدمين مذكرة بابعاد
عرابي وسامى باشا عن الحكم .

سليمان : اللايحة (وهاتفا) اللايحة اللايحة : مرفوضة . اللايحة
اللايحة .. (يلاحظ ضحك واجي فيتوقف محرجا) أيه
يا بنى ؟

راجى : انتم بتسموا المذاكرة لايحة ؟ على فكرة .. عزيزة بنت عمى
بتقول عليها كدة برضة . ويتقول كمان آراء زى آراءك .

سليمان : المهم .. ما قلتليش على الخبر الهايف بتاعك .

راجى : ما انت نسيتهنى الى فى دماغى بالسياسة بتاعتك . شوف
يا سيدى . أنا نويت أتجوز .

سليمان : بتتكلم جد ؟

راجى : ثلاثا جدهن جد وهزلهن جد ياشيخ سليمان .

سليمان : وسوف تتزوج من ؟ أقصد متى ؟ يعنى كيف ؟ قصدى
لماذا ؟

راجى . لماذا ؟ لماذا حا اتجوز يا مولانا ؟ يعنى مش عارف لماذا ؟

سليمان : أقصد هل وضعت عينك على حد معين ؟

راجى : أيوه .. عزيزة .

سليمان : عزيزة ؟ عزيزة من ؟ بنت عمك دسوقي ؟!

راجى : أيوه بنت عمى دسوقي .. جرى لك أيه ؟

سليمان : يا خبر اسود .. بنت عمك دسوقي .

راجى : أيه ؟ فيه مانع ؟! مالها عزيزة ؟ عيبها أيه ؟ ولا حتقول
زى أمى دى أصلها متعلمة ؟

سليمان : لا . مش قصدى هذا . طبعا مش قصدى .. بنت عمك
دسوقي ؟! طب .. طب ... وليه ما فكرتش فى واحدة
من بنات فرنسا ؟ أم هن أقل جمالا مما نسمع ؟

راجى : جمالا ؟ دول قشطة • قشطة يابو داود • بس الجواز لازم
يبقى من هنا الواحد لازم يظمن على شرفه •

(يدخل المغنواى بطبق البيض) •

المغنواى : كلوا بالهنا والشف •

سليمان : تشكر يا سيدى تشكر •• يا أيها المغنى الذى لا يغنى •

المغنواى : الأمر لله •

سليمان : (ناظرا الى راجى) ولو أنى أظنك سوف تغنى عما قريب

المغنواى : ما خلاص •• ما خلاص راح المغنى وراحت ايامه •
(ويخرج ثانية) •

سليمان : (وهو ياكل) وهل وافقت أمك على هذا الزواج ؟

راجى : حتوافق •

سليمان : عجيبة ! (ويلتهم الطبق بسرعة) •

المغنواى : (عائدا بالشاى) اتفضلوا الشاى بالهنا والشف •

سليمان : الحمد لله •

راجى : ده مش أكلك بتاع زمان (وينتقلان للجلوس على الأريكة)

سليمان : اسمع يا راجى • لندخل الآن فى الجدد قبل أن تحضر أمك
(وينتظر خروج المغنواى ليقول) أخبرنى زميل معى بالمجاورين
أن الجماعة الأجانب بيسلحوا أنفسهم ، وكميان العربان أنصار
الخدوى •

راجى : (واضعاً ساقاً على ساق) آه . امبارح كان رئيس نقطة
القناصل بيكلم عمر بك . . المحافظ يعنى . كان بيكلمه فى
الحكاية دى .

سليمان : (متضايقا) وانت ايه وداك عند الرجل ده يا سى راجى ؟

راجى : كان باعت لى عثمان أمسك وظيفة مترجم فى السرايا . . فى
القاهرة .

سليمان : يعنى تشتغل عند الخديوى ؟

راجى : بصراحة ياسليمان . . أنا متحير . . عرابى على حق جازى ،
انما أخطاؤه كبيرة ويمكن تودى البلد فى داهية .

سليمان : عرابى مش غلطان يا راجى . . انت فاهم ؟

راجى : ماهية دى مصيبتنا . . مش قادرين نشوف فى الزعما
بتوعنا غير حسناتهم . الثورة علم يا مولانا مش مجرد حماس

سليمان : المهم . . اياك تقبل الوظيفة دى . . انت فاهم ؟

راجى : أنا لسه ما قبلتش . . انما أنت كنت عاوز ايه منى ؟

سليمان : آه . . (ويقترب منه فى الوقت الذى تطل فيه آسيا
برأسها تتسمع) أنا كنت جاي استتلف الطبنجة كام يوم
وارجعها على طول .

راجى : الطبنجة بتاعة أمى ؟

سليمان : أى نعم .

راجى : بس . . طب و . . . ودى أجيبها لك من أمى ازاي ؟

سليمان : تصرف يا أخى . نحن فى محنة . الأجانب يتربصون بنا فى كل زقاق والبوليس عاجز والحالة طين .

آسيا : (مندفعة الى الداخل) بقى كدة يا شيخ سليمان ؟! وأنا الى كنت عاملاك زى ابنى ! تقوم حضرتك عاوز تجرجر لى الولد فى المصايب . بتاعتكم ؟

سليمان : الحقيقة أنا . . . أنا . . . كنت أقصد استلفها بضعة أيام فحسب .

آسيا : ولا حتى تشوفها بعينك . ده أنا دافعة فيها دم قلبى وشايلها أحمى بيها نفسى وابنى .

سليمان : وأنا برضة أقصد أحمى بيها البلد يا خالة .

آسيا : مالناش دعوة بالبلد . خللوا عرابى بتاعكم يلم نفسه وكل حاجة تتصلح .

راجى : باقول ايه يابينة . احنا هنا فى غيط العنب بعيد عن الدوشة لكن سليمان ساكن فى كوم الدكة . . . يعنى جنب الخطر .

آسيا : احنا بعيد عن الدوشة آه . بس فيه خطر علينا من ابن عمك المجرم قتال القتلة . وكمان فيه خطر تانى انت مش دريان بيه .

سليمان : يوسف يا خالة شاب وطنى . وما فيش منه خطر عليكم ولا حاجة ده حتى لسه معمول له محضر فى قسم البوليس لانه ضرب خواجه مالطى لما عسمة العافية .

آسيا : شفت . . . يعنى قتال قتلة زى أبوه .

سليمان : مش تعرفى الأول هو ضربته ليه ؟

آسيا : مش عاوزه أعرف .

راجي : (باهتمام) ليه ليه يا سليمان ؟

سليمان : عشان الخواجة كان معاه بت اجرجية وكانوا سكرانين .
ويوسف جدد ابن بلد ودمه حامى . راح نازل من الحنطور
ومخرج الاتنين وفين يوجعك (والى آسيا) راجل زى .
منه خطر على أهله ازاي يا خالة ؟

آسيا : أنا ما أعرفش الكلام ده . أنا اللي دخل فى دماغى دخل
بالدم ولا فيش حاجة تطلع غير الدم .

راجي : (مستاء) يعنى قصدك ايه ؟ أروح أقتل يوسف عشان
تستريحى ؟

آسيا : لا . أنا ما قلتش كدة . أنا مش عاوزاك تضيع انت كمان
سليمان : ده كلام زين . يبقى ناخد بالناس من الخطر اللي جاى علينا
كلنا . خطر الأجانب يا خالة .

آسيا : (صائجة) أنا ما أعرفش الأجانب يا شيخ سليمان . أنا
أعرف حاجة واحدة وبس . الخطر اللي علينا مننا فينا .
سيبونا فى حالنا بقى . كل واحد يحافظ على روحه وعلى
بيته . أنا واحدة ليا عدوين من قرايب جوزى و . . . ومن
قرايبى كمان . والطبنجة دى أنا شايلها من زمان لى يقرب
منى . . لى يفكر يمد ايده على حاجة ملكى أنا .

سليمان : (واجما) يعنى نتسلح لأنفسنا ، ولا نتسلح للأجنبى .

آسيا : قلت لك أنا ما أعرفش الأجانب يا شيخ سليمان . أنا أعرف
الى قتلوا جوزى أبو ابنى . وأعرف الى عاوزين يورثوا
أرضى لو ابنى مات (وتجار بالبكاء) .

راجى : يا نينة .. مش كدة .

آسيا : (بقوة مفاجئة) هيه كلمة ما فيش غيرها .. (والى الشيخ)
خافين من الأجانب روحوا لعرايى بتاعكم ، خلوه يديكم سلاح
من عنده . روحوا له كلكم وسيبوني فى حالى (وتعود الى
البكاء) .

سليمان : (يطأطأ رأسه) حقك عليا يا خالة . ما تزعليش
منى ... أنا .. سلامو عليكم (ويخرج) .

راجى : استنى يا سليمان اما آجى أوصلك .

آسيا : (تجذبه من ذراعه بقوة وهى ما تزال تنشج) هوه عارف
السكة .

راجى : (بعد أن خرج صديقه) ما كانش حقك تكلميه بالشكل ده .

آسيا : اسكت انت خيلنا فى الى احنا فيه .

راجى : هوه آيه بس الى احنا فيه عاوز أفهم .

آسيا : اسمع يا راجى . انت عارف بعد أبوك ما اتقتل أنا عملت
آيه عشان أحافظ عليك ؟ أنا سفرتك بره مش عشان تتعلم

راجى : أمال عشان آيه ؟

آسيا : عشان أبعدك عن الى عاوزين يقتلوك .

راجى : تقصدى يوسف .

آسيا : مش بس يوسف . انت فاهم ان قرايى الفجر دول من
مصلحتهم انك تعيش وتورث أرض أمك ؟

(تتأمله برهة) انت .. عاوزنى أجوزك عزيزة .

راجی : طبعا عاوزك تجوزينى عزيزة .

(يكتشف التفير فيلتفت نحوها ثم يصيح جزلا) نينة . .
ده معناه انك موافقة .

آسيا : بس بشرط .

راجی : اتشرطى ياست الكل . كل شروطك مجابة .

آسيا : تقبل الوظيفة الى قال لك عليها المحافظ .

راجی : (بدهشة وتوجس) طب وأيه مصلحتك فى الحكاية دى ؟

آسيا : هيه دى مصلحتى ومصلحتك .

راجی : مصلحتك انى أسيبك واروح اشتغل فى مصر .

آسيا : أيوه . عشان تبعدوا انت ومراتك والعيال الى حتخلفهم
عن هنا .

راجی : وانتى ؟

آسيا : أنا ؟ أنا ما تخافش عليا . وطول ما انت عايش ما حدش
يقدر ييجى جنبى .

راجی : بس . . بس دى السرايا مركزها مهزوز . والحديدوى يمكن
يطير .

آسيا : ده عقلك انت الى حيطير . انت برضه مصدق ان الفلاحين
يقدروا يحكموا البلد دى ؟! كان غيرهم اشطر . اسمع يا بنى
انت لازم تعرف حاجة مهمة قوى . . الى فى ايده الفلوس
هوه الى يقدر على كل حاجة . . ده حتى يقدر يشتري البنى
آدم من نفسه .

راجى : (يبتعد محزوننا) للأسف • كلامك صبح • من يملك يحكم

آسيا : طب وزعلان قوى كدة ليه ؟

راجى : (مستمرا فى التفكير) وده معناه ان عرابى مش جيستمر

آسيا : معلوم • عرابى ده حاجة كدة طيارى •

راجى : والخديوى كمان •• مش هوه الى حيحكم •

آسيا : ازاى بقى ؟

راجى : فلوس البلد كلها مرهونة فى بنوك الأجانب •• يبقى

الأجانب هما الى حيحكموا •

آسيا : طب والأجانب واقفين جنب مين ؟ جنب الخديوى •• يبقى

أنت كمان لازم تقف جنب الخديوى

راجى : ده كلام يوجع القلب يا نينة •

آسيا : بس هوه الى يدخل العقل (راجى يتمشى مفكرا) •

راجى : يعنى أنا لو ••• لو قبلت الوظيفة دى تجوزينى عزيزة ؟

آسيا : تانى يوم على طول •

راجى : طب عن اذنك شوية (ويمضى الى الداخل) •

آسيا : ياللا ادخل غير هدومك قابل المحافظ خليك تخلص •

(يدخل المغنواتى ومعه التربى « ابراهيم المتاوى ») •

آسيا : (لنفسها) يا حفيظ احفظنا • أيه الى جاب الراجل ده
دلوقت ؟

المغنواتى : المعلم ابراهيم المتاوى عاوز يصبح •

آسيا : الهى تنطس فى نظرك يا مغنواى يا خال أبويا .

(والى المتناوى بضيق شديد) نعم ؟ عاوز أیه يا معلم ؟

المتناوى : لا .. بس .. ال .. الترب يعنى . كانت عاوزه شوية
محارة فقلت آخذ رأى الست الأول .

آسيا : من غير ما تاخذ رأى الست ما تعمل الى انت عاوزه .

المتناوى : آه .. بس ال ...

آسيا : ال ... أیه ؟ محتاج فلوس !

المتناوى : كلك نظر يا ست أم راجى أفندى .

آسيا : طب خليك شوية عقبال ما اجيب لك من جوه (وتدخل) .

المتناوى : (بدهشة) هیه مالها الولية دى كل ما تشوفنى تتلخبط
كدة ؟ أیه العبارة ؟ هوه شكى فيه حاجة غلط ؟

المغنواى : لا وانت الصادق . الغلط مش فى شكلك .

المتناوى : آمال فى أیه ؟

المغنواى : فى شغلتك يا خويا .

المتناوى : (بدهشة صادقة) شغلتي ؟ ومالها شغلتي ؟ أحسن شغله

المغنواى : يا سلام !

المتناوى : هوه فيه أحسن من متاوية الرمم الى فى الدنيا دى !

المغنواى : (ينظر اليه مستغربا ثم يقترب منه قائلا) ألا قوالى
يا معلم .. انت بتجيب منين الكلام ؟

التناوى : كلام ؟ كلام آيه ؟

المغنواتى : الى بتغنيه كل ليله عند الكوم الأحمر .

التناوى : ما تقول عند الترب . . نعم ؟ ماله الكلام ؟ عاجبك ؟ !

المغنواتى : ان جيت للحق هوه كلام ينتع القلب . مين علمك تقوله ؟

**التناوى : (يقترب منه مبدندنا) الكفن جاهز . . ومية التفسيل باردة
بتنمش الميتين . . زى العصافير كلهم جوه ايدى . . وايدى
صياد محترف .**

**المغنواتى : (مأخوذا كالمسحور) طب . . طب بس بس . . أحسن
الولية تسمع تقول بنقول عليها .**

التناوى : (ضاحكا بلا صوت) بس انت الكلام عاجبك . صح ؟

المغنواتى : (مسحورا) صح .

التناوى : شوف . أصل هيه دى الحقيقة ولا مفر . صح ؟

**المغنواتى : صح ! (ثم منتزعا نفسه منه بعد جهد قائل) بس الدنيا
برضه حلوة . (بعد برهة) المهم ما قلتليش مين علمك الكلام ؟**

التناوى : (ببساطة) ده واحد شاعر من اخواننا .

المغنواتى : (مرتعدا) اخواننا ؟ اخواننا مين يا معلم ؟

التناوى : اخواننا . . الى تحت الأرض .

**المغنواتى : (بفزع شديد) يا ساتر . يا ساتر يارب .
بسم الله الرحمن الرحيم . . اللهم اجعل كلامنا خفيف عليهم .**

المتاوى : أيه ؟ انتم كلكم كدة ؟ كل عيشتكم خوف فى خوف ؟
خايفين من الحديوى يضربكم بالكرباج ، ومن الجركس ليضربوكم
بالنار ، ومن البوليس ليحبسكم فى القراقون ، ومن أهاليكم
ليدعوا عليكم ، ومن عيالكم ليقسوا عليكم .. طب خلاص
بقى .. خايفين ليه من الجان .. هما الجان جيعلوا فيكم
أكثر من اللى بيعملوه البنى آدمين ؟ وخايفين ليه من الموت
(مشبرا الى نفسه) مش الموت أحسن لكم من العيشة دى ؟
(تدخل آسيا تلقى اليه بقطعة فضية محاذرة أن تلمسه) .

آسيا : خد .. خدمة ثانية ! (وتغسل يديها بقارورة
عطر) .

المتاوى : أنا اللى تحت أمرك يا ست . سلامو عليكم (ويخرج) .
المغنواتى : (ذاхла) الراجل ده بيقول كلام !

آسيا : (تصرخ) مش عاوزه اسمعه .. واتفصل انت كمان ورينى
عرض كتافك . رايع تجيب لى تربى ينوح عاينا فى يوم زى
ده (يخرج المغنواتى ذاхла) .

هوه راجى اتأخر فى أودته كدة ليه ؟

(تجلس على الأريكة وتخرج زجاجة العطر تغسل يديها
ووجهها ؟ ياللا خليه يتجوز ويمشى من هنا قبل ما يجرجروه
بتنوع الهوجة الجواز بقى حيخليه يهمد فى حضن مراته . أنا
مش عاوزه يرجع الغيط قبل ما يخلف دستة عيال على
الأقل . لازم اللى ينخفوا يشيلوا من دماغتهم انهم يورثونر ..
آخ ! بس ما لقاش غير عزيزة ؟ عزيزة بنت دسوقي ؟! ...
ياللا أحسن ما يحرن على الجواز ويلاقى نفسه فاضى يقوم عقله

يوديه ورا .. الشيخ سليمان والشيخ ترتان ... آخ ..
بس عزيزة ؟! ... ياللا عزيزة عزيزة ما دام بيحبها يبقى
حيفضل لازق لها .. أبوه برضه عمل كده ..

(تنظر ناحية غرفته) انما ده اتأخر قوى فى اللبس (تنادى)
راجى .. يا راجى ..

راجى : (عائدا ما زال فى جلبابه المنزلى) أيوه يانينة ..

آسيا : الله .. انت لسه ما لبستش ؟

راجى : والله يا نينة قلبى مش مطاوعنى انى اسيبك هنا لوحدا

آسيا : نعم يا خويا ؟ قلبك مش مطاوعك ؟ اسم النبی حارسك !
لا لازم يطاوعك .. يعنى حيكون قلبك انت أحن من قلبى أنا
عليك ؟

راجى : (بتردد) وكمان .. كمان حكاية السرايه دى ...

آسيا : (تقاطعه) آه .. قول بقى انك عين فى الجنة وعين فى النار ..

راجى : ما هو أصل ...

آسيا : (تندفع نحوه فى ثورة هائلة) لا أصل ولا فصل .. اسمع
يا ولد انت أنا ما احبش المدلون ، ورحمة أبوك فى نوعته
ان ما عملت الى اتفقنا عليه ما أنا مجوزاك ولا مورثاك ..
ومن بكرة حا أوزع الغيط على قرايى بيع وشرا .. ياللا بلا
أرض بلا هم .. نايبنى أيه أنا من ده كله غير القلق وسهر
الليالى (وتزداد هياجاً) ده انت طالع لابوك يا وله ! أنا بقى
الى حا اتصرف زى ما اتصرفت قبل كدة (تصيح منادية)
يا مغنواتى .. يا مغنواتى روح انده لقراييك الفجر خليفهم
يجيبوا أى فلوس معاهم وييجونى حالا .. يا مغنواتى ..

راجى : (ممسكا بيدها بقوة) خلاص . خلاص . خلاص .

آسيا : (هادئة فجأة) خلاص ؟ خلاص آيه ؟

راجى : (مطاطنا راسه) حا اشتغل فى السرايا .

(تنتهه ارتياحا ومع تدريج اظلام المسرح يسمع صوب
المغنواتى منشدا من بعيد) .


يا صوانى دورى دورى

يا صوانى الحنة

شعر. الحلوة يا عصفورى

ريحته من الجنة

(اظلام تام)



المنظر الثاني

قبل اضاءة المسرح يسمع صوت سيدة عجوز تغنى :

ننه هوه ننه هوه

هرب الحصان ياهوه

ودموعه فوق خده

علشان ابوه مده

ننه هوه ننه هوه

سال الحصان ياهوه

الميه ليه سوده

وانا لابس الموده

ننه هوه ننه هوه

(حين يضاء المسرح تلبس السيدة زاهية ، ام يوسف حجازى
التمحاوى « جالسة على شلثة تهدد حفيدها . المنزل مقسم الى
غرفتين : الى اليمين غرفة نوم بها سرير نحاسى بناموسية والى اليسار
حجرة الجدة وبها كنية للنوم ، وهى تستخدم كغرفة للجلوس والطعام
والفسيل ايضا .

عيشة زوجة يوسف تنتقل بين الحجرتين تلملم الفسيل وتبحث عن
شىء ما وهى مفضبة) .

غيط العنب - ٣٣

عيشة : انتى حطيتى الكنسة فىن ؟

زاهية : عندك ورا باب أودتكم يا عيشة .

بائع : (من الخارج) والله استويت يا تين يا سلطانى .

بنكلتين الوقة يا بت

زاهية : (تحدث نفسها مستغربة) بنكلتين الوقة ؟ شوف البياعين
الى ما بيخافوش من ربنا ؟

(وتعود الى الغناء لحفيدها) أرقص مع الزفة .

والرقص ده خفة

كرشونى ليه الحلق

وأنا عمرى ما أقول لا

وأنا عمرى ما أقول لا

ننة هوه ننة هوه

عيشة : (تقترب منها فى عصبية متزايدة) فيه حاجة عندك عاوزه
تتغسل ؟

زاهية : لا

(تعود عيشة الى الداخل تحضر غسيلة تضعه فى طست الماء
وتغسله فى هياج . بينما تغنى الجدة للحفيد)

رجع الحصان يا خاى

من غير ما يشرب شاى

من غير ما يشرب شاى

ننة هوه ننة هوه

يا شجرة فى البستان

ده حصانى بات عيان

وركابه مكسورة

والدم عا القورة

والدم عا القورة

ننه هوه ننه هوه

ننه هوه ننه هوه

بانع : (من الخارج) والله استويت يا تين والشهد ساح منك
يا طالب الأكلة يا عنب •

بانع آخر : معانا الجمبرى بتعريفه •

البلطى الى بيلعب يا بت

عيشة : (تنادى من النافذة) يابتاع السمك •

زاهية : وطى صوتك يا عيشة اعملى معروف •

عيشة : (تعود غاضبة) آهو مشى من غير ما يرد عليا •

زاهية : (تستأنف الغناء) •

وقف وما تجيشى

قلع لى طربوشى

وسد شباكى

بهنومك الكاكي

خلينى فى الأحلام

زى الشجر ساكت

يا ريت أنام ساكت
يا ريتنى يامه أنام
يا ريت أنام ساكت
ننه هوه ننه هوه

(وتنادى عيشة بصوت خافت) يا عيشة .. يا عيشة ..

عيشة : (تقبل هادرة) نام الولد ؟

زاهية : يا بت وطى صوتك ليصحي تانى . خديه دخليه جوه

عيشة : هاتى

زاهية : سمي عليه الأول

(يدخل يوسف فتعيد عيشة الولد الى جدته وتقف أمامه
متحدية) .

يوسف : آيه ؟ ماله الولد ؟

زاهية : ما لوش .. نام بعد ما غلبنا .

عيشة : مش عارف ماله يا سى يوسف ؟ متضايق . الولد متضايق

يوسف : ومتضايق من آيه بقى بسلامته ؟

عيشة : مش عاجبه حال الدنيا .

يوسف : ان شاء الله ما عجب . نجيبوله دنيا على مزاج أبوه منين ؟

زاهية : ما ترد على البنية كويس . انت آيه ؟ ما خدش عارف
يكلمك ليه ؟

يوسف : ما تأخذنيش يا مه • أصلي فلفان اليومين دول من الخي
بيحصل في البلد •

عيشة : واحنا مالنا بقى ومال الخي بيحصل في البلد ؟

زاهية : ياللا يا أم سيد • شوفي طلبات جوزك •

يوسف : اعلى معروف يا أم سيد حضري لى لقمة آكلها عشان الحق
وقتي •

عيشة : يعنى طالع تاني ؟

يوسف : أيوه طالع • فيها حاجة دى كمان ؟

عيشة : بالحصان اظن •

يوسف : أيوه يا عيشة • ايه العبارة ؟!

زاهية : ايه معنته الكلام ده ؟

عيشة : ورايح فين بالحصان العصرية دى كمان ؟

يوسف : يعنى جاروج بيه فين ؟ جاروج لمسى الحداد يشوف صرفه
فى الحدو الخي يطلع كل شوية

عيشة : بطل تروح ترعة الفرخة وانت ماتحتاجش لحدادين خالص

يوسف : ترعة الفرخة ؟ يعنى ايه ؟

زاهية : تقصدى ايه يابت ؟

عيشة : (منفجرة) أيوه • مانتى امه هوه ياست زاهية • لازم
تجامى له •• آمال

زاهية : آه يا مجنونة . هوه أنا أمه لوحده برضه .. ما أنا أمك
انتى كمان

عيشة : لا . أنا أمى ماتت من زمان . وإبويا راخر مات . واخواتى
كلهم ماتوا . أنا مقطوعة من شجرة .. ماحدش عاوزنى ..
ما انتى لو كنتى أمى أنا كنتى وقفتى له

زاهية : أقف له فى ايه بس ماتفهمينى !

عيشة : يعنى مش عارفه بىروح فى كل يوم بالحصان ؟ أنا ماعدتش
أستحمل العيشة دى . أنا حآآخذ ابنى واروح أرمى نفسى
فى البحر .. آه .. أنا وابنى ، علشان يستريح مننا والجو
يخل له . آه يا أمه !

يوسف : (صارخا) بس .. الله ! ايه الحكاية بالضبط ؟

زاهية : (تغغم) ترعة الفرخة ؟ ترعة الفرخة ؟ !

يوسف : وايه بقى تطلع ترعة الفرخة دى

عيشة : أيوه استعبط استعبط ياسى يوسف

يوسف : بطل قلة أدب أحسن أكسر لك دماغك حتتين

عيشة : معلوم . أصل احنا مانشبش !

يوسف : تشبى مين انطقى ؟

عيشة : عيلة القمحاوى .. الى ماتقدرش تكسر دماغهم ياروحى !

زاهية : (بدهشة) ينيك ياعيشة . تكونيش قصدك على عزيزة
يابت ؟

يوسف : (يضطرب فجأة) عزيزة ؟ وايه جاب سيرة عزيزة دلوقت ؟

زاهية : مش سامعها عمالة تلقح الكلام من الصبح (وملتفتة الى عيشة ؟ يابت ده موضوع وخلص من زمان

عيشة : لا لسه . يوم الجمعة الى فات ناس شافوه بعد الصلا رايح جاي فى سكة بيتهم .

يوسف : أيوه يا جمدعان ! زبون وكنت باوصله . أقول له ماقدرش أروح ناحية الترعة ألا مراتى ترمى نفسها فى البحر ؟

عيشة : طب وأول امبارح .. رحت فىن بالحضان من غير العربية ؟ يوسف : ماقلت لك يا وليه عند مرسى الحداد

عيشة : كذب . أنا سألت مرسى قال مارحتش ناحيته من جمعيتين يوسف : يعنى دايرة تتجسسى عليا .. طب عليا الط ..

زاهية : (تقاطعه بسرعة) يوسف .. الله ؟! ماتصلى على النبى آمال !

(ولعيشة) خشى انتى يا أم سيد حضرى اللقمة لجوزك وسبيينى معاه شوية (وتناولها الطفل) وخدى الولد نيميه على السرير جوه ياللا

عيشة : (تتحرك باكية) حاضر يانينتى (وتخرج حاملة الطفل الى الغرفة الاخرى)

زاهية : ايه الكلام ده يا ابو سيد ؟

يوسف : كلام ايه يا امه ؟ (عيشة فى الغرفة الاخرى تضع الطفل على السرير)

زاهية : كمان أنا عايز تضحك عليا !

يوسف : صدقيني يا امه .. أنا مافيش حاجة فى دماغى من الناحية
دى خالص أنا (ويتردد) أنا دماغى فيها حاجات اهم

زاهية : حاجات زى ايه ؟ (وتتفرس فيه برهة) أبو سيد .. أوعى
تكون مع بتوع الهوجة .. ده احنا مالناش غيرك

يوسف : (مرتبكاً) .. سيبها .. سيبها .. على الله يا امه

زاهية : ونعم بالله ، بس احنا برضه مالناش غيرك فى الدنيا

يوسف : ربنا لنا كلنا (من تحت السرير أخرجت عيشة زلعة المش
والعيش والبصل)

زاهية : أنا قلبى مش مطمئن كده يا يوسف .

(ترجع عيشة بطبق الطعام وبصلتين وأرغفة فيجلس يوسف
الى الطبلية يهشم بصلة بقبضة يده قائلا)

يوسف : اقعدى كلى معايا وشيلى من دماغك الكلام الهجص ده ياب

زاهية : ايوه ياختى شيليه من دماغك خالص

عيشة : أشيله ازاي وأنا سامعاكى بودانى بتقولى له إن قلبك مش
مطمئن ؟! هه ؟ ماتقوليلى ياست زاهية ؟

زاهية : يابنتى دى حكاية تانية خالص

عيشة : شفتى ازاي انتى كمان عاوزه تضحكى عليا ؟!

يوسف : يعنى بلاش أكل اللقمة ؟ ماتهمدى بقى

عيشة : حاضر .. حا احمد ياسى يوسف .. ما انت عاوزنى أموت
عشان تلحقها قبل ماتروح منك

يوسف : هيه ايه الى تروح منى ؟ انتى عاوزه تطيرى عقلك
عيشة : معلوم .. مش خلاص اتخطبت ؟! يبقى لازم عقلك يطير
زاهية : وهيه عزيزة اتخطبت ؟!
عيشة : حاتتخطب ! مال وشك اصفر كده ياخويا ؟
يوسف : وحاتتخطب لمن عزيزة ؟
عيشة : لابن عمك
يوسف : راجى ؟

عيشة : (بشماتة) أيوه راجى . هيه متعلمة وهو متعلم . أبوها
عنده ملك وهيه حتورته ، واهه عندها ملك وهو الى
حيورته .. غيط العنب حيمد لمكرم بك .. مايتجوزوش بعض
ليه بقى ؟ فيه أحسن من كده جوازة ؟ ايه ؟! ماتكمل أكلك ..
ولا نفسك اتصدت ؟! ماتقولى له ياكل ياست زاهية

يوسف : وانتى جبتي الأخبار دى منين ؟
عيشة : من عمك فهيمة المجنونة
يوسف : (ثائرا) فهيمة مش مجنونة .. اوعى تقولى عليها كده
تانى لأكسر رقبتك (ثم يهدأ قليلا) وانتى شفتيها فين عمى
فهيمة ؟

عيشة : قابلتها أول امبارح فى البياصة
يوسف : وتلاقيكى رحتى معاها بيت عمى
عيشة : وانت ايش عرفك ؟

يوسف : مانتى لازم تعملى كده .. مش كنتى عاوزه تشوفى عزيزة
من زمان ؟ هوه أنا مش عارفك ؟

(صوت الطفل يعلو باكيا فتهرع اليه عيشة عابرة الغرفة)

زاهية : مالك يا يوسف ؟

يوسف : ايه ؟! مالى يا عالم ؟! ولا حاجة .. مافيش ايتها حاجة

زاهية : مافيش ازاي ؟ ده انت جسمك كله بيترعش

يوسف : (ينتفض واقفا) أنا نازل

زاهية : نازل رايح فين ؟ يوسف .. استنى يا يوسف .. يوسف
(كان هو قد خرج وعادت عيشة من الغرفة الاخرى تحمل

الطفل الباكي)

عيشة : راح لها

زاهية : هيه مين بس الي راح لها انتي كمان ؟

عيشة : (تبكي مع بكاء الطفل) شفتي زعل عليها ازاي ؟

زاهية : وليه ماتقوليش زعل على غيط العنب لما فكرتبه ؟

عيشة : وهو لو كان زعلان على الغيط كان سكت السنين دى كلها ؟
أبدا هو مافيش فى دماغه غير عزيمة

زاهية : (تنهض بصعوبة) والنبي انتي بتدلعي .. آه يا رجليا ،
ده بدل ماتشوفى شوية زيت كافور وتقولى لى تعالى لما أدهن
لك يا امه ؟ ياللا قدامى نيمى الولد وانا رايحة أنام جنبه

عيشة : (بخجل) الزيت خلص .. دلوقت أروح اشحت لك شوية
من عند الولية أم ريكو

(وقبل أن يصل إلى الباب الفاصل بين الغرفتين يسمع صوت
يوسف يتنحنح بقوة هاتفا : ياساتر

فترتد المراتان الى حيث كانتا فالغرفة الداخلية أيضا مخصصة
لاستقبال الزوار . تبدو الفرحة على وجه عيشة)

عيشة : ده يوسف رجع ياامه

(يدخل يوسف ووراءه رجل فى نحو الثلاثين هو المعلم سيد
العجان)

زاهية : (فى الغرفة الاخرى) أيوه كده فرفشى يابت

يوسف : اتفضل يا معلم سيد

سيد : سلامو عليكم .. يا ساتر

زاهية : ربنا مايحرمكيش من دخلته

عيشة : ده باين عليه المعلم سيد العجان (الطفل يبكى)

سيد : (ليوسف) ماكانش له لزوم دلوقت يا ابو سيد

يوسف : ازاي بقى ؟! ده انت لغاية دلوقت ما شفتوش

زاهية : شيلي الولد واضحكى فى وشه

يوسف : (مناديا) الشاى يا ام يوسف

زاهية : (منادية) حاضر يا ابو سيد (وتجهز عدة الشاى والموقد)

سيد : (بتخرج) بس انت كمان باين عليك مستعجل وتلاقينا
عوقناك

يوسف : كلام ايه ده يا معلم ؟! دى الرجعة لك والقومة لك . ده
انت معلمى واخويا الكبير . اتصدق بالله احنا سميننا ابنى
على اسمك مخصوص عشان يطلع ملو هدومه زيك

سيد : (منسرجا) الله يخليهولك وبيارك لك فيه يا أمير يا ذوق
زاهية : (تاخذ الطفل من عيشة) والا أقولك هاتى الولد معايا
واعمل انتى الشاى

(عيشة تشعل الموقد • بينما يقدم السيد العجان لفافة تبغ
ليوسف ولنفسه)

يوسف : ايه ده ؟ دخان ؟! تشكر يا سيد المعلمين ، ولو انى ماليش
تقل عليه

سيد : ياراجل اشرب اشرب ، ماحدش واخذ منها حاجة

يوسف : (ساهما) على رأيك • كلها محصلة بعضيها •

سيد : من حق •• مش الحاجة اياه جه الموقف وسأل عليك •

يوسف : (يسعل من أثر اللفافة) خواجه مين يا معلم ؟

سيد : (يضحك) المالطى الى انت نشيته العلقه هوه والبت اياها

يوسف : (متذكرا عابسا) آه •• وكان عاوز ايه الزفت ده
كمان ؟

سيد : بيقول عاوز يصطلى معاك

يوسف : (مندهشا) يصطلى معايا ؟ هوه احنا كنا صحاب
واتخاصمنا

سيد : والله باين عليه راجل طيب يا يوسف يا خويا • تلاقيه
رجع لضميره وغلط نفسه

يوسف : لا يا معلم • العالم دى لا عندها ضمير ولا خشا (وبهياج)

ده انت لو شفته كان بيعمل ايه مع الكلبة الى كانت معاها

كنت قلعت الجزمة وضربته بيها على عينه (ويبصق بقوة)
اتقو

زاهية : (تهر الطفل) قال دلوقت ينام قال .. ياولد صحصح فيه
ضيوف علشانك

سيد : (يتأمله معجبا) انت يا بنى دمك حامى كده على طول ؟!

يوسف : أعمل ايه بس يا ابو السيد ؟ خلقتى كده

عيشة : (صبت الشاي فى الاكواب) طلع خفيف الشاي يا امه ؟

زاهية : احسن ما يبقى مر يا عيشة

سيد : آمال ياخويا ساكت على حقك ليه فى غيط العنب ؟

يوسف : شوف يا معلم .. أنا يمكن أفرط فى حق نفسى .. جاين
يعنى .. انما حق غيرى لا .. رقبتي تضيق ولا حق غيرى
يضيق .

سيد : حلو .. بس الدنيا عاوزة المهاودة .. وبعدين انت مالك ..
هوه الحاجة كان عمل فيك انت حاجة ؟ قالوا له يا جحا ..

يوسف : (ثائرا) لا يا سيد .. ده كلام ولا مؤاخذة عيب .. ده
الحصان بتاعى له حق عليا .. العربية ذاتها لها حق عليا ..
البحر الى كتنا ماشيين جنبه له حق عليا .. دى بلدنا طاهرة
يا جدع .. يقوم ييجوا شوية كلاب ينجسوها وحتى
مانقولش لا ؟!

(زاهية تضع الطفل على الكنبه وتأخذ صينية الشاي بينما
تتناوله عيشة تنظفه وترتب لفائفه)

سيد : (معجبا به جدا) والمرسى أبو العباس انت راجل مجدع

زاهية : (عند الباب الفاصل تضع طرف ثوبها على جانب وجهها
وتلوى)

الشأى يا يوسف

سيد : (ينهض مسلما بغير مصافحة) ماكانش له لزوم والله
يا حاجة

زاهية : يا سلام ! أقل منها • عقبال بكاريك يامعلم

يوسف : (متناولاً منها الصينية) كتر خيرك يا أمه • تكمل جملك
بقى وتجيبي لنا سيد علشان يسلم على عمه سيد

زاهية : من عنيا لتنين

(وتعود الى الغرفة حيث تناولها عيشة الطفل فتتوجه به الى

العجان)

سيد : ما شاء الله ما شاء الله •• اللهم صلى على النبي (وياخذنه
بين يديه) •

يوسف : أمه عاوزاه يتعلم فى المدارس (ضاحكا) ، عاوزاه يطلع
طرى على آخر الزمن

سيد : (بسماحة) وماله •• مايتعلم وبرضه يطلع ناشف زى
عراي باشا وسامى البارودى

يوسف : (راضيا) آه •• اذا كان كده معلش

سيد : (يقفز كالملسوع) الله الله الله ! كده برضه يا سيد ؟

يوسف : عملها الخنزير !؟

سيد : (ضاحكا) طالع ابن كلب لمن الولد ده يا يوسف ؟

يوسف : (مثله وهو يتناول الطفل) ضرورى لعمه سيد

سيد : (يقهقه سعيدا وهو يضع قطعة فضية فى لفائف الطفل)
كده برضه ؟

يوسف : (يتراجع بالطفل محرجا) يامعلم •• يامعلم مالوش
لزوم

زاهية : (عند الباب تأخذ الطفل من ابنها) كده يا ولد كسفتنا ؟
الله يكسفك !

سيد : (وهو يجفف ثيابه بمنديله) انما انت مالك النهارده
يا ابو سيد فيه حاجة شاغلة بالك
يوسف : لا يا معلم مافيش

سيد : مافيش ازاي . . ده انت ايدك عمالة تترعش آهي (ويلكزه
مداعبا) هما الجماعة مش ربعنوا خلاص ؟

يوسف : (بحياء وعتاب معا) يامعلم !

سيد : (متحولا الى الجديدة) ولا انت خايف على عرابي باشا من الى
بيحصل دلوقت

يوسف : مطبوط . مطبوط كده يامعلم . عاوزين ياخدوا منه
حاجة هيه من حقه هوه (الجملة الأخيرة يقولها بعصبية
وبصوت عال)

زاهية : (لعيشة) رجعتي تكشري ليه يابيت ؟

سيد : ربك يدبرها بمعرفته !

يوسف : معلوم . بس لازم نعمل حاجة !

زاهية : انتي حتعيطي تاني

سيد : طب وواحد زيك في ايده يعمل ايه ؟

يوسف : في ايدي . . أيوه في ايدي وربنا حيقدرني

عيشة : (تصيح باكية) سامعاه بيقول ايه

سيد : مش حتقدر يا يوسف ياخويا . . الموج عالي قوى

(يرتفع صوت بكاء الطفل) يدوم الشاي

يوسف : يدوم عزك يامعلم

سيد : هيه . استأذن أنا بقي (وينهض)

يوسف : (ناهضاً مثله) مش بدرى يامعلم ؟
سيد : بدرى من عمرك يا خويا . يتربى فى عزك سيد
يوسف : تعيش يا سيد المعلمين .. باقول ايه ؟ ماتاخذنى معاك
على السكة (ويخرجان والمعلم سيد لا ينسى أن يهتف)
سلامو عليكم .

عيشة : (بفجعة) شفتى ؟ آهو طالع تانى .. رايح لها
زاهية : يوه .. مايمكن رايح يوصله وراجع تانى .. ماترجعى
لعقلك بقى يامرات ابنى
عيشة : (صارخة) لا .. ده راح لها ، أنا قلبى بيقوللى انها عملت
الخطوبة دى علشان تحركه .. أنا شفت ده فى عنينا .. عاوزة
تاخده منى .. بس ده بعدها .. ده جوزى أنا ، ده أنا أقتلها
وأقتله .. ده ملكى أنا ...

(يعود يوسف ثانية ومعه الشيخ سليمان لاهنا)

يوسف : تعالى يا مولانا اتفضل
سليمان : أنا مش حا اعطلك كثير .. كلمتين فحسب
عيشة : (بفرح شديد) ده رجع تانى يامه
زاهية : استريحتى ؟

يوسف : (بشماتة) كل ما يبجى يروح لها حاجة تعطله
سليمان : (هامساً) انت عرفت ان عمر لطفى كان يريد وضع
نديم فى السجن ؟

يوسف : (بانزعاج) ليه ؟ حصل ايه ؟
سليمان : القى خطاباً فى جمعية المقاصد الخيرية
يوسف : طب ما احنا كلنا سمعناه .. ده حتى كان بيقول للناس
مش عاوزين دوشة

سليمان : أيوه . التزام السكينة وعدم الاثارة الآن ضرورة وطنية
يوسف : وده كلام يزعل المحافظ فى ايه ؟
سليمان : أيوه يزعله ، ويزعل الحديوى المجرم
يوسف : ازاي بس ؟ ادبنى عقلك
سليمان : أصل الهدوء والسكينة يفوتان الفرصة على المؤامرة
يا يوسف
عيشة : أعمل لهم شاي يامه ؟
يوسف : (يفكر بدهشة) مش فاهم يامولانا
سليمان : يا ابني الأجانب يريدون أن تحدث فوضى لتكون للخديوى
حجة فى طلب دخول الأساطيل الأجنبية والقضاء على عرابي
يوسف : آه !
عيشة : باقول لك أعمل لهم شاي ؟
زاهية : (وهى تتسمع على الغرفة الأخرى) اسننى يا عيشة .
سليمان : (هامسا) علشان كده أنا جيت لك . عاوزك تلف على
كل الناس تبلفهم ان مندوب السلطان جاى بكرة ولا بعده .
المظاهرة برضة حتطلع زى الاتفاق . بس مش عاوزين حد
يسخن أو يقوم بأى عمل استفزازى
عيشة : (بفيظ لزاهية) هما بيقولوا ايه ؟
سليمان : (يجذب يوسف بعيدا ويهمس) اللايحة اللايحة ..
يوسف : (مثله) مرفوضة
سليمان : الناس بتوعك لازم يفهموا الكلام ده . كل الناس من
أول ترعة الفرخة لغاية القبارى . المنطقة دى بتاعتك وانت
المستول عنها .

يوسف : حاضر

سليمان : عاوزين درويش باشا يرجع للسلطان يقول له الشعب المصرى شعب منظم وليس فوضويا . عاوزينه يقول له انها ثورة عادلة وليست هوجة كما يزعمون .

يوسف : أملك يا شيخ سليمان

سليمان : الشيخ ابراهيم باشا قد يحضر معه من القاهرة خطابا هاما جدا .. قد يكون فيه حسم الموقف .. كل يوم تروح تستناه عند محطة الركاب القديمة فى القبارى ، وساعة ما تشوفه تقول له « فىن البطيخة » .

يوسف : بطيخة ؟!

سليمان : اسمعنى يا جدد . دى أمانة .. يقوم هو يدريك الجواب تجيبه وتجيلى على طول

يوسف : وهو الشيخ ابراهيم جاى امتى ؟

سليمان : الشيخ جاى متنكر عشان أعوان الحديوى مراقبينه .. عشان كده حييجى فى قطر البضاعة .. (يوسف يقاطعه بلهفة)

يوسف : امتى ؟

سليمان : يمكن بكره يمكن بعده . المهم كل يوم لازم تكون هناك فى ميعاد القطر . حصانك جاهز ؟

يوسف : ما انت عارف . من بعد العصر بيكون جاهز وتحت أمركم

سليمان : اذن هيا بنا حتى تلحق ترجع قبل الليل

يوسف : (متحركا) طب .. مش تشرب الشاي يامولانا

سليمان : شأى إيه دلوقت يا أخينا • الموقف متأزم جدا • هيا
(ويخرجان مسرعين)

زاهية : يوسف •• يا يوسف •• (وتحاول أن تلحق به عبتا)
عيشة : راح لها (وتلقى بالطفل على الفراش صارخة)

زاهية : بسم الله الرحمن الرحيم • سلام قولاهن رب رحيم •
كده برضه يا عيشة •• عاوزه تموتى الولد؟!

عيشة : ياريتنه يموت • ربنا ياخدنى أنا وهو فى ساعة واحدة •
زاهية : يابت حرام عليكى • بلاش الدعا لتكون بيان السسما
مفتوحة •

عيشة : ما هو ده الى أبوه عاوزه

زاهية : لا ده انت اتجننتى والى كان كان

(وتخرج بالطفل الى الغرفة الاخرى تاركة عيشة تبكى
بحرقة • يسمع صوت بائع العنب ينادى فى الحارة)

البائع : والله استويت يا عنب يا طالب الأكلة •• يا عنب يا أحمر
بدمه

زاهية : ياساتر استر يارب •• أنا قلبى مقبوض كده ليه ؟

ينزل الستار

مع سماع مغن صوته شبيه

بصوت المفتواتى يأتى من بعيد

المغنى : جسمك ..

فرس برى

جارى ،

ويجربى

راسم خطوط الوعد

مكتوب ومتقربى

يا اسكندرية الروح

قلبى حمام مجروح

يا اسكندرية الروح

قلبى حمام مجروح

خايف عيون العدا تلمح آيات حسنك

وقلبى هو الفدا

لو ينقطف غصنك

يا اسكندرية الروح

قلبى حمام مجروح

..

..

الفصل الثاني

المنظر الأول

٢

الصالة بمنزل دسوقي القهحاوى .. وهى حجرة متسعة تتمتع
بلمسات ذوق جميل ، فهناك على الحائط لوحة زيتية كبيرة تمثل فارساً
يعدو على حصان ، وعلى المناضد زهريرات بها ورود حمراء ، وعلى النوافذ
ستائر ذات ألوان متناغمة . توجد أريكة عريضة بالمنتصف وبجانبيها
فوتيه وثير .

والى اليمين مقعدان بينهما منضدة صغيرة عليها طاولة (نرد)

يدخل دسوقي القهحاوى - وهو كهل مرح - يقود عجوزاً فرنجياً
يرحب به ويجلسه على الفوتيه الיותר .

دسوقي : أهلاً وسهلاً . اتفضل يا روفسير البيت بيتك ولو انه
مش قد المقام .. دى عزيزة حتفرح قوى لما تشوفك .. هيه
زمانها جاية . ده احنا زارنا النبى (وضاحكا) ما تأخذنيش
يا خواجا .. ولا أنا غلطت فى ايه ؟ أصل ولا مؤاخدة أنا
راجل كده على قدى . الى بيبجى فى دماغى بأقوله .. بس
أنا ما احبش حد يزعل منى ، تقوم تلاقينى أقول كلام يطلع

هوه الى يزعل (ويربت على كتف العجوز بقوة غير مقصودة
مما يجعل الرجل يسعل بشدة) عموما حمد الله بالسلامة ..
وامتى شرفت من أوربا ؟

البروفسير : امبارح ... و ...

دسوقي : (يقاطعه بسرور) امبارح ؟ ياسلام ! وجاى النهارده
تزورنا ؟! ياسلام كلك واجب يا روفسير .. ياسلام ! خمس
سنين بحالهم من يوم ماسافرت .. فبن أيامك الحلوة ؟ وان
شاء الله ناوى تقعد معنا على طول ؟

البروفسير : لا .. أنا مسافر ..

دسوقي : (مقاطعا) ياراجل تسافر ايه تانى ؟ انت ماشبعتش
سفر ؟! والله لأنت قاعد معنا لغاية مايحيلك أمر الله ..
(ومنتبها الى نفسه) هه ؟! ايه ده ؟ هوه أنا غلطت تانى ؟

البروفسير : صحيح المدازيل بتشتغل دلوقت فى مدرسة خيرية ؟

دسوقي : (بحرج) ماتآخذنيش ياخوaja .. ماكانش ده عشمك
فيها .. والله ولا عشمنا .. كنا فاكرين حتشتغل فى بيوت
الامرا .. انما بقى من يوم ما قابلت سى نديم وهيه اتغيرت
خالص .. سابت « اللاسيه » بتاعتكم وراسها وألف ج ..
ألف سيف لتعلم .. ايه يا سيدى ؟ بنات الغلابة .. وأنا
بقى ساكت .. ما أنا مش ناقص مصيبة تانية .. مش لازم
الواحد يعمل كل شوية مصيبة لأهل بيته .. كفاية الى حصل
لعمتها من تحت راسى الناشفة .. أصل أختى فهيمة
ولامؤاخذه يعنى ..

البروفسير : (مقاطعا) مسيو دسوقي

دسوقى : نعمين يا روفسير ؟

البروفسير : أنا سعيد بما حدث

دسوقى : (مندهشا) سعيد بما حدث ؟! سعيد بالى حدث
لاختى فهيمه ؟! انت عارف حدث لها ايه الأول ؟ دى رمت
نفسها من الشباك وقعت على دماغها .. ومن يومها وهي
عندها لطف .. تقوم تقوللى سعيد بما حدث ؟ طب ايه
السعادة اللى فى كده ؟

البروفسير : (بحماس) أنا سعيد بما حدث لممازيل عزيزه .
المجتمع المصرى ينقصه بنات زى مدمازيل عزيزه . هذه هى
بداية النهضة والحضارة

دسوقى : (مستغربا بشدة) حجارة ؟ حجارة ايه ياخواجا ؟ ..
عموما عزيزه آهى وصلت . وهي اللى بتعرف تتفاهم معاك
(ولنفسه باستغراب هائل) اللى بتعمله عزيزه .. يبقى بداية
الحجارة ؟! طب ازاي ؟!! يمكن ! عموما عزيزه آهى وصلت ،
وهي اللى بتعرف تتفاهم معاك ..

(لكن السيدة التى دخلت لم تكن عزيزه بل فهيمه فيناديها
شقيقها صائحا)

دسوقى : تعالى يا فهيمه .. تعالى سلمى

(أما هى فما أن تسمع الجملة وتبصر الرجل حتى تشهق
وترتمى على الأرض فى نوبة من الصرع . يسرع اليها الرجلان
منعورين)

دسوقى : فهيمه . فهيمه .. أنا غلطت فى ايه دلوقت كمان ؟؟

البروفسير : (مخرجاً زجاجة صغيرة من جيب صديريته يضعها تحت أنفها) ماتخافش .. ما تخافش .. بسيطة .. هيه .. هيه الحكاية دى بتجيلها دايمًا ؟

دسوقى : ساعات وساعات . الظاهر أنا غلطت فى حاجة .. آه ؟ تلاقىها افتكرت انك عريس وأنا حاصصصبها تتجوزك .. أصلها ضاربة عن الجواز من يوم أنا كرشت الولد الى كانت عاوزاه (ويناديها فى أذنها) فهيمه .. ده مش عريس .. اسمعيني كويس .. ده المدرس بتاع عزيزة .. الحوجة بتاع زمان ، جاي يسلم علينا ، فوقى بقى يابت

فهيمه : (تغغم وهي ترفس بقدميها) لا .. لا يا مصطفى . ماتخافش مش حا اتجوز غيرك لو حتى موتونى

دسوقى : (بحسرة) أصل الولد الى كان طالبها خدوه بتسوع السلطة ومات فى السويس .. (وضاعط على أعلى أنف فهيمه باصبعيه) فوقى بقى يافهيمه .. ماتخافش قلت لك (وللرجل ميرثا نفسه) الكلام ده من خمستاشر سنة ، ومن يومها وهيه ضاربة عن الجواز (بدأت فهيمه فى الافاقة فيساعدوها على القيام قائلًا) قومي بقى كسفتينا قدام الأجانب الله يكسفك

فهيمه : (تنهض فى خجل) يا عيب الشوم ! ايه الى جرى لى

دسوقى : ياللا خشى على أودتك جتك داهية (فتخرج بسرعة)

البروفسير : قصة وفاء عظيمة . أنا أحترم الشعب المصرى

دسوقى : ربنا يكرمك ياخواجا . انت طول عمرك حنين علينا .. حاجة تانية حضرتك غير كل الأجانب الى شفنهم

البروفسير : أنا أدرس الحضارة المصرية فى السوربون .. بفرنسا
دسوقى : (بدهشة متزايدة) تدرس الحجارة المصرية فى فرنسا
ازاى ! طب وايه الى ودى الحجارة بتاعتنا فرنسا ؟ أما حاجة
عجيبة بصحيح !

البروفسير : (باسم) أنت تخلط بين الحضارة والحجارة (وفجأة
يتوقف ناظرا اليه بدهشة) مسيو دسوقى .. أنت لا تخلط
مسيو دسوقى فعلا .. موجود مسلة فرعونية بفرنسا ،
ونحن ندرس النقوش المكتوبة عليها .

دسوقى : مسلة زى عامود السوارى بتاعنا ،

البروفسير : بالضبط مسيو دسوقى . نقلتها حملة نابليون من
هنا الى هناك .

دسوقى : يا دين النبى .. ده احنا اتسرقنا بقى ! (ويهرش
متحيرا انما أنت ولا مؤاخذه .. وصلت للسن دى ولسه
بتدرس فى الحجارة زى ال ...) تدخل عزيزة على وجهها
يشمك أبيض رقيق) .

دسوقى : الحمد لله .. آهى عزيزة وصلت وهيه الى بتعرف
تتفاهم معاك .

البروفسير : (ناهضا) Ma petite Fille, Mon chere semblable

عزيزة : (تجرى نحوه تصافحه بحرارة)
Monsieur Isaque, mon chere quand vous êtes arrivé a Alexandrie ?

البروفسير : aujourd'hui

عزيزة : (بسعادة) أهلا

البروفسير : (مثلها)

Je suis très content ds vojr nouveau direction

(دسوقي ينقل بصره بينهما محتارا تلمحه عزيزة فتحييه
باسمة) .

عزيزة : مساء الخير يا بابا (وترفع اليشمك عن وجهها الجميل)

دسوقي : (بتضرع) ما تتكلموا عربى يا عزيزة

عزيزة : (آخذة بذراع البروفسير تجلسه ضاحكة) بابا عنده
حق يا ميسو اسحق ، لماذا لا نتحدث باللغة العربية التى
تحبها فعلا ؟

اسحق : ولم لا ؟ الاعتزاز باللغة القومية مسألة تحسب للشعب ،
خذى الألمان مثلا .. لا يتحدثون الا بالألمانية .

عزيزة : (بجدية) الألمان أقوياء . أما نحن فما زلنا نتعلم

اسحق : (بحماس) أنت الآن تعلمين شعبك ، وهذا عمل يخدم
الحضارة الانسانية كلها .

دسوقي : (ساخرا) آل لما اتكلموا عربى قمت أنا فهمت .. بس
لو أفهم ايه حكاية الحجارة الانسانية دى ! (وللبروفسير)
عن اذنكم اخللى فهيمة تعمل الشاى .

اسحق : (بلهجة عامية فجأة) متشكرين .. يا سيد المعلمين ..
يا ذوق .

دسوقي : (يعود برأسه اليه مندهشا ثم يحاول أن يبادله التحية)
ميرسى .. كونستابل

(عزيزة والبروفسير ينفجران ضاحكين)

اسحق : أنا سعيد ان نديم قدر يخليكى تكسرى التقاليد الغبية
وتخرجى للمجتمع وللشغل . . وفين ؟! فى مدارس الفقرا ،
مش فى سرايات الأعيان .

(تظهر فهيمة عند الباب حاملة صينية الشاى تشير الى
عزيزة أن تحضر اليها . فى هذه اللحظة تسمع حوافر
حصان يركض بالقرب من النافذة فتكاد الصينية تسقط من
بين أيدي الفتاتين فهيمة تهمس لعزيزة ضاغطة على الحروف)

فهيمة : آهو جه النهارده كمان

عزيزة : (باضطراب) طيب ، طيب يا عمتى

(وتتقدم تضع الصينية أمام الاستاذ وتجلس ذاهلة)

اسحق : أنا أؤيد الثورة المصرية . . صديقى مسيو نونيه قنصل
سويسرا يؤيدها مثلى . يجب أن تقابلى هذا الرجل . . لقد
قالى لى بالامس « لا بد أن تأخذ مصر مكانها فى العالم المعاصر

. . هذا أمر لصالح أوروبا فى المدى الاستراتيجى ، لكن
المستعمرين الأغبياء لا ينظرون الا لمصالحهم الأنانية الضيقة ،
. . انه رجل رائع حقا ! (يتوقف فجأة وقد لاحظ شرودها)
انتى مش معايا . سرحانة فى ايه ؟ (وكان قد شرب شايه
تقريبا أثناء حديثه) .

عزيزة : (منتبهة) هه ؟! لا لآ . . ما فيش . اتفضل الشاى
يا بروفسير .

اسحق : (اذ تعطيه كوبها غير منتبهة فينظر اليها هو بمكر)
انتى . . بتحبى !

عزیزة : (منتفضة) نعم ؟!

اسحق : (يعيد اليها كوبها قائلا بهدوء) اشربي شايك وكلميني .
أنا مربيكي من سن سبع سنين .. اتكلمي ياما ..

عزیزة : (قررت أن تتكلم فعلا) الى .. كان يبجری بالحصان
ده .. ابن عمي .. يوسف ..

اسحق : (مفكرا) يوسف ! آه .. مش ده اللي قلت لي انه
حيخطبك قبل ما اسافر ؟

عزیزة : أيوه .. بس أنا رفضته

(ينهض اسحق يتأمل اللوحة الزيتية بتمعن ثم يستدير
اليها)

اسحق : وليه رفضتيه ؟

عزیزة : (بغضب) لانه جاهل وسوقي .. ما كانش ممكن يفهمني

اسحق : مع انك بتحبيه (مشيرا الى اللوحة بحاجبيه)

عزیزة : كنت غلطانة .. مش معقول طول عمري أفضل أحب واحد
جاهل زي ده .. واحد رأيته ان البنبت تقعد في البيت تقشر
بصل وتوم ..

اسحق : وليه ما حاولتيش تعليمه الصبح ؟

عزیزة : المفروض الراجل هوو اللي يعلم الست

اسحق : ده عيب الشرق .. الفرض ده بالذات معناه ان المرأة هنا
حتى ولو اتعلمت بتشوف نفسها أدنى من الرجل .. علشان

كده ما بترضاش تتجوز الا راجل أعلى منها .. كأنها بتعترف
انها لازم تكون فى الوضع الأدنى ..

عزيزة : فعلا مسيو اسحق . ده حصل معايا بالطبط . عشان
كده فكرت اتجوز ابن عمى الثانى المتعلم وأسافر معاه فرنسا
.. بس هو سافر لوحده ، ودلوقت بعد ما رجع عاوز
يتجوزنى .. وأنا مش عارفه اعمل ايه !

اسحق : تتجوزى الى بتحببه طبعا . اتجوزيه وعلميه . اشمعنى
بتعلمى غيره ؟ افرضى ان هوه الى كان متعلم مش كان واجبه
يتجوزك ويعلمك .

عزيزة : بس ده سابنى بعد ما رفضته . أربع سنين ما شفتش
وشه .

اسحق : (بحماس) انتى تروحي له

عزيزة : أروح له ازاي بعد ما اتجوز وخلف طفل

اسحق : (عابسا) Ci tragdi parole فعلا مشكلة
عنيفة

عزيزة : وأنا كمان اتغيرت من ساعة ما اشتغلت فى الجمعية وعرفت
نديم .

اسحق : (باهتمام) ازاي مدمازيل ؟

عزيزة : ما عادش يهمنى أسافر فرنسا زى زمان .. النهارده بافكر
أرمى حكاية الجواز دى خالص ورا ضهرى وأوهب نفسى
لتعليم البنات .. أنا لازم أعيش هنا وأموت هنا .. صحيح
فرنسا بلد الحرية ، بلد ما فيهاش عقد ولا حريم .. إنما
هنا بلدى أنا .. لازم اتدفن فى ترابها .

اسحق : هذا شعور عظيم عزيزة ابنتى

عزيزة : (تكاد تبكى) بس .. بس كل ما اشوف عمى والى
بيجرى لها أخاف على نفسى (وتنشأ باظافرها فى ذراعيها)
دى شىء مش طبيعى . لحد امتى ؟ لازم تقول لى أعمل ايه
يا بروفسير .

اسحق : (يتأملها باشفاق) السؤال ده .. مش ممكن حد يجاوب
عليه غيرك ، وتأكدى انك فى الوقت المناسب حتعملى الصح
(ويصافحها بحزن) .

عزيزة : مش أنت وعدت زمان انك حتقعد معانا على طول ؟

اسحق : آمال أنا جيت ليه هنا .. بس أنا مسافر القاهرة كام
يوم وراجع لك .. حا أقعد معاكى فى اسكندرية على طول
(وضاحكا) لحد ما يجينى أمر الله زى ما بيقول أبوكى .
أوريفوار .

عزيزة : (تودعه الى الباب) مع السلامة . ما تتأخرش عليا أرجوك
(ولدى خروجه تدخل فهيمة)

فهيمة : شفتى الى حصل من أبوكى ؟

عزيزة : حصل ايه ؟

فهيمة : خلانى سخسخت قدام الخوجة بتاعك .. افكرته ..

عزيزة : (تنهد) يا ريت كان ينفع .. كنتى تبقى أسعد ست
فى الدنيا .

فهيمة : (ترتعش) انتى كمان يا عزيزة ؟

عزيزة : (تسرع اليها تحتضنها) لالا . خلاص . يتقطع لسانى .
مش قصدى .

فهيمة : أنا اتجوز غير الى القلب افتتح له ؟
عزيزة : (بفضب) طب ما أنا حا اتجوز غير الى القلب افتتح له
فهيمة : وكان حد ضربك على ايدك ؟
عزيزة : آمال عاوزانى أعمل ايه ؟ هه ؟ اروح للعريجي الحيوان ده
وأقول تعالى اخطفنى على حصانك .. أصلى مش قادرة أعيش
من غيرك ؟
فهيمة : (بمكر) ومال جسمك بيترعش كده وانتى بتجيبى سيرته
عزيزة : (صائحة) وانتى مالك ومال جسمى ؟
فهيمة : (بقوة) أيوه تروحي له . وتقولى له انك مش قادرة
تعيشى من غيره .
عزيزة : (بكبرياء مشتعل) أنا ؟ أنا أعمل كده ؟
فهيمة : أحسن ما تعيشى مع واحد جسمك من جوه مش رايده .
عزيزة : (صارخة) طب ومراته ؟ وابنه ؟ يا عمتى انتى مش
فهمانى .. أنا أموت ولا أخرب بيت واحد مالهاش ذنب ..
وهوه زى تمام . مش ممكن يظلم مراته وابنه .. أنا عارفاه
من أيام ما كان عندنا ثلاث سنين .
فهيمة : آمال ايه اللى بيجره على حصانه كل يوم قدام البيت ؟
عزيزة : « سارحة » ما يمكن حاجة تانية
فهيمة : لا تانية ولا تالته . هوه رايدك وانتى رايداه . حتفضلى
تستنى كده لحد ما يقولوا ده مات خلاص ؟

عزيزة : (تصرخ) بس .. بس يا عمتى اعملى معروف ما تقوليش
كده .. ده يوم ما يوسف يموت .. أنا كمان حا اموت .

فهيمة : (تبكى) اشمعنى أنا ما متش يوم مصطفى ؟ اشمعنى
أنا ؟! ياريتنى كنت هربت معاك يا مصطفى يا ريت .

عزيزة : (بقسوة) كانوا حياخدوه منك برضه ويودوه السويس
فهيمة : آهو كنا عشنا مع بعض ولو شهر .. ولو جمعة ..
يومين .. ساعة زمن (وتبكى بحرقة فتهرع اليها عزيزة) .

عزيزة : طب عشان خاطرى والنبي بلاش الى بتعمله فى نفسك
ده .. زمان الناس جاين (فهيمة لا تتوقف) انتى عاوز تعملى
لى فضيحة ليه النهارده ؟ عاوزه تطفشيهم يعنى ؟! اعملى معروف
أنا مش عاوز ابقى زيك .

فهيمة : (تتوقف فجأة وتنظر اليها باحتقار) تبقى زىي ؟ وانتى
تقدرى ؟!

عزيزة : قصدك ايه بالكلام ده ؟

فهيمة : (بنفس الاحتقار) الفرسة الأصيلة ما يركبهاش الا الفارس
بتاعها (وتخرج رافعة رأسها . يسمع صوت الحصان يعدو
بالخارج تتخشب عزيزة فى وقفته . يدخل دسوقى فى جلاب
جديد) .

دسوقى : مالك واقفة متسمرة كده يا عزيزة ؟ ما تدخلى توضبى
نفسك الجماعة على وصول . (تمضى عزيزة الى الداخل
منكسة الرأس) .

دسوقى : (يجلس الى النرد يلعب شخصا وهميا)

يا رب بقى الحكاية دى تتم على خير . البت كبرت وماحدهش
راضى يتقدم لها . معلوم . . الناس لها حق تخاف منها .
ما احنا عيلة مجانيين . . آى والله يا سى محمد . الأخ يقتل
أخوه . . والأخت ترمى نفسها من الشباك علشان ولد
مارضيتش اجوزه لها . . البت !! البت طالعة دوننا عن بنات
البلد كلها متعلمة (ويخبط كفا بكف) طالعة مجنونة زى
عمتها . (وصائحا) وانا كنت غلظت فى عمتها يا ناس !؟
عيل مش من مقامها . ما كانش حلتته ثلاثة فضة . مش من
فوله ولها كيال يا عالم ؟ (ومتحسرا) بس يا ريتنى ما قلت
لا . (ونادما) ما هو لو كان صمم كنت حا اوافق ورجلى
فوق رقبتي . انما هو عمل لى عنده كرامة وراح ما جاش .
طب يا خويا مع ألف سلامة . . آهو علام ! آدينى باوافق
على الى عزيزة موافقة عليه . (وبأسف) يا خسارة
يا يوسف . كان نفسى البنت دى تكون من نصيبك . (يقبل
يده) الحمد لله . . أنا بقى فى حكاية عزيزة ما غلظتش .
هيه الى قالت على يوسف لا . آل ايه أنا متعلمة وهوه جاهل
طب يا اختى آهو جالك المتعلم أكثر منك ومن الى خلفوكى
(ومحدثا الشخص الوهمى الذى يفترض أنه يلعبه بالترد)
انما عارف يا سى محمد . . الوله ابن حجازى ، يوسف
العريجي ده فى مذهبي أجدع ميت مرة من ابن عثمان . انما
تقول ايه بقه يا خويا كل شىء قسمة ونصيب (منتبها الى
ضجة خارج البيت فيغلق الطاولة مسرعا) باين عليهم وصلوا
. . يا فهيمة . . يا فهيمة

(عند الباب يستقبل القادمين بهتاف وترحيب) أهلا وسهلا
يا تلتيمت مرحبا . أهلا يا مرات أخويا .

(تدخل آسيا فى رداء أسود أنيق ووراءها راجى فى بذلة
جديدة وطربوش على رأسه)

دسوقى : أهلا وسهلا أهلا وسهلا • نورتنى البيت يا مرات أخويا
يا سلام ! والله زمان يا سى راجى •• اتفضلى هنا على الفوتين
ده • أهلا أهلا أهلا • (وينادى) يا فهيمه •• انتى يا فهيمه
(آسيا تجلس صامتة ، بعد قليل تظهر فهيمه من الداخل
جامدة) تعالى يا فهيمه سلمى على مرات أخوكى وابن أخوكى

فهميه : ازيك يا آسيا ؟

آسيا : (ببرود أشد) ازيك انتى يا فهيمه ؟

فهميه : نعمده • ما تشيللى يا ختى اليشمك الى على وشك ده •
هوه فيه هنا حد غريب ؟

آسيا : (ترفع النقاب بتحد) كويس كده ؟

دسوقى : (صائحا) ما شاء الله ما شاء الله • زى ما كنتى من
عشر سنين واجدع كمان

فهميه : وانتى ازيك يا آسيا ؟

آسيا : ما قلت لك ازيك انتى يا فهيمه

(المراتان فى حالة توتر متصاعد وان احتجب خلف العبارات
العادية)

فهميه : أعمل لك شاي ولا قهوة يا آسيا ؟

آسيا : لا شاي ولا قهوة يا فهيمه

راجى : (متدخلًا مبتسما) احنا عاوزين نشرب شربات يا عمتى

فهيمة : حتشرب يا خويا حتشرب • وأمك • أمك كمان لازم

تشرب

آسيا : يوهو • ما قلت لك مش عاوزه • ما باشربش حاجة بره بيتى •

راجى : (هامسا لأمه) ايه الكلام ده يا نينا ؟ هيه عركة ؟

(تظهر عزيزة فيناديها أبوها مبتهجا فتقدم بخطوات حازمة)

دسوقى : تعالى يا عزيزة • تعالى سلمى على مرات عمك (حين تميل الفتاة لتقبل المرأة تجذبها الأخيرة من شعرها لتتأكد من سلامته)

دسوقى : خلاص • الزعل راح وراحت سنينه • عاوزين نفرح بقى (وناظرا لآسيا بتودد) وياريت نفرح كلنا يا ست الكل •

عزيزة : (وهى تنظر الى راجى مبتسمة) نورت بيتك يا مرات عمى •

آسيا : (بغيط تربت عليها) نورك كفاية يا حبيبتي (وتشير لنفسها بأصبعها ممتعضة لنحافة الفتاة) •

فهيمة : مالك يا آسيا ؟ انتى تعبانة ولا شكلك كده ؟

راجى : (بسرعة) أيوه فعلا تعبت • أصل المطبات كانت جامدة على الحنطور •

فهيمة : (بلهجة خاصة وهى تنظر لعزيزة) ليه انتم جيتم فى حنطور ؟

دسوقى : الله يجازيكى يافهيمة • آمال حبيجوا فى ايه ؟ عايمين فى الترعة ؟!

فهيمة : أقول لك فوزرة يا عزيزة ؟ ايه يعدى البحر ولا يتبلش

عزيزة : جرى ايه يا عمتي ؟ وده وقت فوازير ؟

فهيمة : (مشيرة بعينها الى راجي) العجل فى بطن أمه

دسوقي : (صائحا جاذبا اياها من ذراعها مجلسا اياها بعدا بجانب النرد)

فهيمة .. انتى تخرسى خالص . اقعدى هنا ساكنة من غير صوت .

فهيمة : حكم !

دسوقي : (عائدا الى آسيا) شفتى الفلة بتاعتنا وانتى جاية ياست الكل ..

آسيا : شفتها . كويسة (وتقلب شفتيها احتقارا) بس السكة الى بيننا وبينكم بعيدة قوى .

راجي : (يتنحنج) مش ندخل فى الموضوع يا نينة

آسيا : (بضيق) وماله . ندخل

دسوقي : ياريت ندخل على طول . هوه احنا أغراب ؟ وآهو يبقى كل زيتنا .. فى كل دقيقنا (ويضحك سعيدا باكتشافه)

آسيا : (بجفاء) قصدك ايه يا دسوقي ؟

دسوقي : الى مش قادر أفهمه لغاية دلوقت ليه أرضك وأرضى متفرقين ؟! أنا عن نفسى أحب كل حاجة تنلم على بعضها .. ياسلام لو الأرض تنلم واحنا كمان تنلم ! اتصورى كده

يا ست آسيا .. الأرض دى جنب الأرض دى . كانت تبقى
حاجة فلى بصحيح (يضحك ثم يتوقف لرؤيتها جامدة)

آسيا : يا سلام عا المنع العجالى !

دسوقى : (متراجعا) هوه أنا غلظت فى حاجة ؟ أنا قصدى نحى
بعضنا . أديكى شايقة الى بيحصل فى البلد . محدش ضامن
روحه .. أصل احنا ..

آسيا : (تقاطعه بجفاء) اسمع يا دسوقى . أنا عاوزة عزيزة لراعى
(عزيزة تنسحب قليلا)

دسوقى : خدامينك يا ست الكل . وأنا مستعد أبيع أرضى واشترى
لى حنة جنب الغيط بتاعك ونقعد كلنا سوا .

آسيا : لا تبيع ولا تشتري . احنا كده كويسين

فهيمة : (تهمس لعزيزة التى كانت تقف بجانبها) مبروك عليكى
حماتك القرشانة يازوزو

دسوقى : (لآسيا بلهجة ذات معنى) عشان نحى الولاد

آسيا : راجى حياخد عروسته ويروحوا مصر

فهيمة : (تولول) عبنى .. عبنى على الى راح السويس لوحده .

عزيزة : (هامسة لها) اتلمى بقى أحسن لك .

دسوقى : مصر !؟ مصر ليه ؟ مش سى راجى حيستوظف فى الحاقانية؟

آسيا : لا . حيستوظف فى مصر .

عزيزة : (تقترب من راجى تسأله) أيه الكلام ده ؟

راجى : (بحرج) معروض عليا وظيفة كويسة قوى فى مصر .

عزيزة : (بعناد) وأنا ما اسبيش اسكندرية .

آسيا : يعنى أيه ما تسيبش اسكندرية ؟!

راجى : (مسرعا) ممكن أنا انتقل لسراية اسكندرية يا نينا .

عزيزة : (مصدومة) سرايا ؟! هيه الوظيفة فى السرايا ؟

آسيا : أيوه فى السرايا . والسرايا الى فى مصر مش فى اسكندرية
ومافيش رجوع لاسكندرية قبل ما تخلفوا دسته عيال على
الأقل .

فهيمة : عيلة القمحاوى ما حدش بيخلف فيهم غير واحد فى الزمان
ده .

دسوقي : (صائحا) فهيمة . ما تقطى لسانك شوية . الله !

عزيزة : (لراجى) هو ده رأيك ؟

راجى : ما تخافش . عمك فهيمة دى بتهوى . مش بتقولوا
مجنونة ؟

عزيزة : أنا مش قصدى كلام فهيمة . قصدى كلام أمك .

راجى : (هامسا) احنا نهاودها دلوقت وبعدين نعمل الى احنا
عاوزينه .

عزيزة : لحد امتى ؟ دى لسة شباب . قدامها ييجى ثلاثين سنة
عقبال ما ...

آسيا : (التى كانت تتصنت عليهما من بعيد) انتم بتقولوا أيه
ما تسمعوني .

عزيزة : أنا مش موافقة .

آسيا : (مصدومة) انت بتقول ايه ياختي ؟؟

دسوقي : كلام ايه ده يا عزيزة ؟

عزيزة : أنا مش موافقة ان راجي يشتغل فى السرايا .

آسيا : قوم بينا يا راجي ، دى حتتشرط علينا .

راجي : استنى بس يانينة (ولعزيزة بهدوء) ايه السبب يا انت
عمى ؟

عزيزة : السبب يا ابن عمى ان الحديوى .. خلاص بقى عدو الناس
كلها . وانت عارف ان موه المسئول عن كل اللى بيحصل فى
البلد هوه وابوه .

فهيمة : خصوصا أبوه . الله يحرق أبوه مطرح ماراح . ودى مصطفى
السويس !

دسوقي : ايه يا ولاد ؟! احنا عاوزين نعمل فرح مش مؤتمر سياسى

آسيا : كد مش باين لنا فرح .

راجي : (لعزيزة) ممكن كلامك ييقى فيه شىء من الصبح . انما
عرايى كمان مسئول .

عزيزة : (مستثارة) عرايى يا راجي ؟!

راجي : فح ونصيته بريطانيا .. يقوم يقع فيه بكل سذاجة ؟!

دسوقي : (منتبها) ازاي ؟ ازاي يا سى راجي ؟

راجي : (بثقة فى معلوماته) أنا حضرت محاضرة فى السوربون
لأستاذة كبيرة اسمها مدام جوليت آدم ، حذرت فيها من كل
اللى بيحصل دلوقت .

دسوقى : (بلهفة) وايه هو الى بيحصل دلوقت ؟

راجى : أسافين يا عمى • بريطانيا بتدق أسافين بين الحديوى وبين الجيش غرضهسا ان الحديوى يستنجد بيها لحماية عرشه (ولعزيزة) عرابى بقى جيعمل ايه لو ده حصل ؟

عزيزة : (بقوة) حيحارب طبعاً •

آسيا : (تجذب ابنها بعصبية) قوم بينا يا راجى قوم • دى حشمتغل قائد طابية •

راجى : استنى يا نينة • استنى اعمل معروف (ومواجهها عزيزة بثقة وتعال) بايه ؟ حيحارب بريطانيا بايه ؟ بجيش نصن طباطه جركس بيكرهوه والنص الثانى مرفيهم من تحت السلاح عند فى الحديوى ؟ الحرب عاوزه جيش عصرى • مدرب منضبط • ما لوش دعوة بالسياسة •• وجيش عرابى كله بيشتغل بالسياسة •

عزيزة : (باندفاع أكثر منه) الشعب كله حيحارب معاه • لازم ده يحصل •

آسيا : (لم تعد تحتل) قوم بينا يا ولد قوم دى عاوزه تعمل زعيمة عصاية

دسوقى : والنبى تستنى يا آسيا • ده كلام مهم قوى • ده راجى افندى ده روفسير (فتنجلس آسيا نصف راضية اذ يمدح ابنها) •

فهيمة : قال سابوا الجواز ودخلوا فى الحرب •• بطلوا ده واسمعوا ده !

راجى : (لعزيزة) الشعب ! انتى مش عارفة حاجة • انتى متحمسة بس فى قضية خسرانة • (بتعال) أنا لما كنت فى فرنسا ••

فهيمة : (بغضب) عرفنا انك كنت في فرنسا . (وبجزن) بس
ما عدتتش على السويس .

دسوقي : فهيمة .. انتى تنكتمى خالص .

راجى : (بنفس اللهجة الحاسمة) الشعب الفرنساوى من عشر
سنتين بس دفع تمن غالى حماس زى حماسك . يا بنتى الحماس
مش كفاية . الشعب حيقف مع عرابى ؟ طب ازاي اذا كان
مجلس النواب كل الى فيه أعيان ؟ ليه عرابى ما غيرش
دستور الحديوى اسماعيل ؟ ليه البارودى مالفاش قانون
المطبوعات ؟ مش مفروض ان الثورة حرية ؟ مش مفروض
الناس يسمعو رأيهم ورأى الى بيعارضوه علشان يمشوا وراه
وهما فاهمين بيعملوا أيه ؟

آسيا : (تضع كفها فى مواجهة فهيمة) قل أعوذ برب الفلق من
شر ما خلق .

عزيزة : (لراجى) كل ده حيحصل .. الدستور حيتغير والفقرا
حيدخلوا المجلس والقيود على المجلات والجرائد حتتلقى .

راجى : (صائحا) مش حيحصل . عارفه ليه ؟ علشان حكومة
الثورة ما عندهاش أى ثقة فى الشعب . عارفه ليه ؟

دسوقي : (بلهفة شديدة) ليه ليه ليه ؟

راجى : لان الشعب مش موجود أصلا .

عزيزة : (نائرة) ازاي تقول كده على الشعب ؟!

راجى : مش كل لمة مهما كتبت تبقى شعب . حاولى تفهمى كويس .
كلمة الشعب دى تعبير عن وضع سياسى راق . وضع
بيعبّر عن نفسه من خلال تنظيمات دستورية .. أحزاب .
جمعيات ، نقابات .

عزيزة : ما هو ده الى بيحاول يعملہ نديم (تقولہا بنوع من الضعف) .

راجي : متأخرا . كل ده كان لازم يترتب قبل ما ييجي عرابي .
يا اما عرابي هوه الى جه بدرى قبل الاوان .

عزيزة : (صائحة) بس احنا برضه حنحارب

راجي : بايه ؟ حتحدفوا الاسطول البريطاني بالطوب ؟ فى بلد مديونة لشوشتها .. عيب تتكلم عن الحرب ! والا ايه يا بنت عمى !

دسوقي : ما تجاوبى يا بنت عمه . (عزيزة تصمت كمدا) هه ..
انا عن ذات نفسى شايف الكلام ده مش غلط .

عزيزة : وافرض يا بابا . برضه أنا ما اقدرش اتجوز واحد عاوز يشتغل عند الخديوى . لا يمكن أبدا .

آسيا : اسم النبى حارسك وصاينك . انتى يا ختى فاكرة نفسك الوالدة باشا ؟

راجي : (مقتربا من عزيزة بعاطفية تغاير حديثه السياسى العنيف)
يا نينة .. عزيزة بنت عمى . وهيه أغلى عندى من مسرات السلطان نفسه .

عزيزة : ما هو أنت كمان لازم تضحى . اشمعنى أنا حا اضحى واسيب وظيفتى فى الجمعية ؟

آسيا : (بذهول) لهو انتى كان فى بالك تشتغلى على طول ؟ حنى ..
بعد ما تتجوزى ابنى ؟

عزيزة : وليه لا ؟ مش هوه لسه قايل ان واحدة ست كانت بتعلمه ؟

فهيمه : ما هو عشان كده بيتكلم زى النسوان

دسوقي : (صارخا) فهيمه

فهيمه : (صائحة) انت مش سامعة عمال يكسر فى مجاديف البنية ازاي ؟

آسيا : (هاجمة عليها) اسمعى يا ولية انتى • أنا صابرة عليكى من الصبح • انما تغلطي فى ابني كمان ؟ ده متكلف تقليه دهب يا حبيبتي •

دسوقي : خلاص • خلاص يا آسيا يا ختى حقتك عليا (ويشير اليها خفية بحركة دائرية من اصابعه قرب رأسه حينئذ ترضى آسيا وتعود لمجلستها) •

فهيمه : أنا مجنونة يا دسوقي ؟ طب والنبي لو جوزت بنتك للولد ده لتبقى انت الى ستين مجنون (وتخرج غاضبة) •

دسوقي : ما تزعليش يا آسيا • انتى عارفه فهيمه • غلبانة مخها تعبان •

آسيا : ده لسانها هوه الى تعبان والسم بينقط منه •

راجى : (لعزيزة) على العموم أنا برضه مش مستريح لوظيفة السرايا •

آسيا : راجى • أنا شارطة عليك

راجى : (يربت على يدها مكنسبا ثقة من قدرته على التعبير)
ممکن أنوظف فى حقانية مصر يا نينة • وبالشكل ده تظمنى
انتى وما نزعلىش عزيزة •

دسوقى : (مسرعا) خلاص يا عزيزة •• ابن عمك كده عداه الغلط
آسيا : (وقد حوصرت بحجته) كده برضه يا راجى ؟!

دسوقى : خلاص بقى يا آسيا • هاتى ايدك نقرأ الفاتحة (ويحاول
يمسك يدها)

آسيا : (تبعده) حط ايدك فى ايد الراجل

دسوقى : (مستاء) راجل ؟! (يصافح راجل مبتئسا مغمما
بسرعة) ولا الضالين

(تخرج عزيزة وهى تنظر الى راجى فى شىء من الرضى)

راجى : اعمل حسابك يا عمى كتب الكتاب والدخلة يوم الاحد
الجاى •

دسوقى : نعم ؟! ده احنا لو كنا بسم الله الرحمن الرحيم ما نلحقش
نجهز درابية

راجى : كل حاجة جاهزة • أنا جايب كله معايا من فرنسا

دسوقى : (بتعالم مضحك) من السوربون ؟!

راجى : (كاتما ضحكه) آه •• طب عن اذنك لما أساعد بنت عمى
فى المطبخ •• زى ما بيعملوا فى أوروبا •

دسوقى : (يهمس لآسيا بعد خروج الشاب) مبروك يا جميل

آسيا : (مبهوتة) نعم ؟! انت اتجننت يا راجل ؟!

دسوقي : (متشجعا) عقبالنا .. وليه لا ؟ هوه الحلال غلط ؟
مش برضه جحا أولى بلحم توره (ويقترب منها بهيام)
آسيا : (تقفز واقفة) تور لما يرفسك راجل شايب وعايب
دسوقي : (متراجعا بتكتيك) ايه ؟ هوه أنا غلطت وقلت ايه ؟
آسيا : انت كلك غلط في غلط . عيشتك ذاتها غلط
دسوقي : طب أفهم بقى أنا غلطت في ايه دلوقت ؟
آسيا : بقى يا راجل مش مستحي تقولى الكلام ده بعد السن دى ؟
دسوقي : سن ؟! سن مين ياختى ؟ سنى ولا سنك ؟ أنا عن نفسى
ما كملتش تلا .. اربع .. خمسين . خمسين سنة ، وانتى
آخ منك انتى .. انتى الى يشوفك ما يقولش عليكى أم
ابنك أبدا . بالكثير أخته ، واخته الصغيرة كمان .
(تسمع ضحكات عزيزة وراجى فيشير اليها دسوقي أن
تجلس قائلا)
دسوقي : هس . العيال جايين . أوعى تجيبى سيرة (آسيا تنظر
اليه بذهول)
(تدخل عزيزة بصينية عليها أكواب الشرابات ووراءها راجى
يتابعها بنظرات والهة)
عزيزة : اتفضل يا نينة
آسيا : كتر خيرك . مبروك
عزيزة : الله يبارك فيكى . اتفضل يا بابا
دسوقي : (يشرب وهو يرمق آسيا مغمغما) عقبالنا

آسيا : (تضع الكوب بعصبية وتنهض) قوم بيبا يا راجي
دسوقي : بدرى والنبي يا آسيا • احنا لحقنا نشيع من بعض ؟
راجي : (لعزيزة هامسا) أنا جاى بكرة
عزيزة : (تبتسم بحياء) امتى ؟
راجي : زى دلوقت
دسوقي : (لآسيا) ده احنا محرومين من زمان
عزيزة : (لراجي) طب ما تتأخرش
دسوقي : (لآسيا) حتفكرى ٠٠ هه ؟
آسيا : بتقول ايه يا راجل يا مجنون ؟
دسوقي : فكرى على مهلك وأنا مستنظر
آسيا : (بحزم) الولد والبنت وبس • انت فاهم ؟ ياللا يا راجي
راجي : (دون أن يتحرك يقول لعزيزة) أنا ماشى
عزيزة : (وهى تبتسم لتسمره) مع السلامة
راجي : وجاى بكرة
آسيا : (نافذة الصبر) ياللا ياراجي
راجي : (لعزيزة) حنتكلم كثير بكرة فى ال ٠٠ فى السياسة
عزيزة : (تفهم مراده) ماشى كلامك
راجي : مع السلامة (واذا لا يتحرك تعود أمه مسرعة فتجذبه
بشدة)
آسيا : (يتابعها حتى الباب صائحا وراءها) أنا مستنظر يا جميل
(تبقى عزيزة وحدها • تقف صامتة • يسمع ركض حصان
بالخارج تدخل فهيمة صائحة : سامعة ؟ !

عزيزة : اسكتي . قلت لك مش أنا الى اخرب بيت . أنا أعمر
ما اخربش

فهيمة : اسمعي كويس قبل ودانك ما تتطرش

عزيزة : اسكتي باقول لك . أنا باعلم بنات . فاهمة يعني ايه
باعلم بنات ؟

فهيمة : حا اسكت . وانتي يا مسكينة حتسكتي على طول .

عزيزة : أيوه حأسكت ، وحا اتجوز راجي . انتي فاهمة ؟ أيوه
حا اتجوزه .

فهيمة : (بلؤم) طب قول ان شاء الله .

عزيزة : (مستثارة) حا اتجوزه يعني حا اتجوزه .

(تتجمد الاثنتان كل في مواجهة الأخرى)

انسلام

تنطلق زغرودة وحيدة

وقبل عودة الاضاء على المنظر الثاني تسمع فتاة تغنى في
الظلمة .

الفتاة : صباح الخير يا صبح أخضر .

يا غصن زتون .. على راس الحليوة الزين

بيح

صباح الخير يا غصن البان
يا نور النور يا بدر احمر
صباح الخير على عيون العريس السود
على ايدين العروسة البيض
صباح الخير على السكر

تعود الاضائة

المنظر الثاني

نفس الغرفة وإن امتلات بالورود وبالشباب الجديدة وترى فهيمة
جالسة تجهز طرحة الزفاف

نحن الآن ظهر يوم ١١ يونيو ١٨٨٢

فهيمة : نفسى أعرف الولية عيشة دى أيه اللى جايها من صباحة
ربنا ؟! حتى الكنيف دخلته وراها . . (تنادى) عيشة . .
يا عيشة يا مرات يوسف .

عيشة : (تجيء من الداخل) عاوزة حاجة يا عمتى ؟

فهيمة : ما تيجى تقعدى معايا شوية . جوزك زمانه جاى .

عيشة : (بضيق) لا . هو قال مش حييجى . . أما ادخل اكمل
عمايل العروسة .

فهيمة : ومش حييجى ليه يا عيشة ؟

عيشة : أصل وراه حاجات مهمة .

فهيمة : اخص عليه . حتى فى يوم زى ده ؟!
عيشة : معذور والنبي ياعمتى . ده أنا كنت مش مصدقه ان وراه
حاجات مهمة زى ما بيقول . لحد ليلة امبارح . . . فضلت أذن
أذن لحد بقى ما حكى لى على كل حاجة . يا ريته كان قال من
الأول .

فهيمة : (باستشارة) قال لك ايه يا بت ؟
عيشة : (هامسة) أثاره يا عينى كان بيوصل جوابات مهمة . ده
عرايى باشا يعرفه بالاسم . بس أوعى تجيبى سيرة لحد بالكلام
ده . ليدبحنى يا عمتى .

فهيمة : (لنفسها) يا ريته يدبحك ويخلصنا منك يا أم قويق
يا لزقة انتى .

عيشة : بتقول حاجة يا عمتى ؟

فهيمة : باقول وانتى بقى جيتى تعملى الواجب بداله !
عيشة : ده كلام يا عمتى ؟ وهوه الى أنا باعمله يعمله راجل
برضه ؟!

فهيمة : قصدى تشرفينا قدام أهل العريس .

عيشة : أمال . وهيه عزيزة مش اختى ؟ دستورك بقى لما أروح
لها . أنا مش عارفه من غيرى كانت عملت ايه النهارده ؟
(تعود عيشة للداخل . بينما تنهض فهيمة تنظر من النافذة
وهى تأكل حمصا تخرجه من جيبتها بعصبية) .

فهيمة : آل من غيرها كانت عملت أيه ؟ وهيه قادرة تعمل حاجة
طول ما انتى كاتمة على نفسها ؟ دى البت خلاص كانت
حتطاوعنى وتروح لى قلبها عنده . تروحي طابة انتى علينا
زى القضا المستعجل !!

ياما كان فى نفسى أشوف اتنين بيحبوا بعض داخلين فى
حوض بعض . كان قلبى يرتاح شوية من النار الى قايدة
فيه طول السنين (وذاهلة تناجى شبيحا) يا ترى انت فى
دلوقت يا مصطفى ؟! فى الميه ولا فى التراب ؟ ناس قالوا
انك غرقت فى الكنال . . يبقى زمانك جيت فى التربة الى
قدامى دلوقت . مش البحر منفد على بعضه يا خويا ؟ بس
التربة ميتها حلوة والبحر مالح . . لا الى قالوا انك اندفنت
فى التراب أصدق . التراب طعمه واحد فى كل حنة . . .
عشان كده أنا كل يوم أحط بقى على التراب وأحس بطعمك
على لسانى . وأنا باشم الهوا المليان تراب بأحس انه جايب لى
ريحتك من بعيد .

(يدخل المغناتى هاتفيا فى سرور بالغ) .

المغناتى : خلاص . افراج .

فهيمة : (تصيح) مصطفى ؟

المغناتى : (يتوقف مصدوما للحظة) ال . . الولية آسيا قالت
لى غنى زى ما انت عاوز (يقترب منها محاولا الترسية عنها)
أنا بقى حا اغنى لك الغنوة الجديدة لوحداك . أصلى شايفك
زعلانة ولازم أخليكى تنبسطى .
(ويبدأ الغناء بصوت شجى به لوعة غريبة بلحن من مقام
الصبا) .

مع العاشقين يا ليل العاشقين سهران
وفاتح للنسيم الصيفى شباكك
ومتزوق . . بثمر الحنة والريحان
ومتعطر . . بريحة الأرض والمية

تمد ايديك سنين الفرقة تتبعتر
أمد ايديا ، يرجع لى العذاب تانى
قتلنى الشوق .. حرق قلبى البعاد المر
وده المكتوب على جبيني .. بحرمانى

فهيمه : ودى بقى الفنوة الى تخلى الحزينة تفرح ؟ ولا تخلى
الفرحانة ترمى روحها فى الترفة ؟

المغنواتى : ايه ؟ مش عاجباكى ؟

فهيمه : مش عاجبانى ازاي !! يا سلام ! دى عاجبانى ونص .
بس والنبي ابقى غنيها لى وهما بيدخلونى التربة (تعاتبه
فى غير جدية) يا راجل يا مجنون يا بو عقل بدنجان فيه
حد يغنى غنوة زى دى فى يوم فرح ؟

المغنواتى : (بطريقة المتاوى) بس انتى الكلام عاجبك .. أصل
ابراهيم المتاوى عرفنى على واحد صاحبه شاعر انما ايه !!
عقبالنا زيه يارب ! ده بيؤلف كلام أجده من ده ..
وحتسميه فى وقته .

عزيزة : (تدخل ووراءها عيشة) مين الى كان بينوح من شوية ؟
هوه انت ؟

المغنواتى : (بفخر) بس انتى الكلام عاجبك .. ده واحد صاحبي
شاعر كبير قوى هوه ...

عزيزة : (تقاطعه) بس . وآدى قاعدة . أما أشوف آخرتها معاكم
(وهى تنظر الى فهيمه فى غيظ) ده جو بتاع جواز يا عالم ؟

عيشة : سيبك منهم يا عزيزة يا ختى .. ياللا بينا نكمل .

عزيزة : كفاية كده . الحر حيموتنى .

عيشة : (تخطيط على صدرها) كفاية كده ؟ ما ينفعش ياخنى
ماينفعش • قومي معايا ماتضيعيش نفسك (يسمع صوت
حصان يقترب) •

فهيمة : (بلؤم) مش ده حصان يوسف ؟

عزيزة : (تشير الى عمتها خفية أن تصمت) لا • مش هو •

عيشة : (تصوب اليها نظرة حاقدة) وانتى ايش عرفك ان كان
هو ولا مش هو ؟

فهيمة : (تسكب زيتا على النار) جرى ايه يا عيشة ؟ مش
ابن عمها ؟!

ماهى عارفاه وعارفة حصانه (عزيزة تشد شعرها غيظا)

عيشة : (بنفس الحقد لفهيمة) بتقولى ايه انتى كمان يا ولية
انتى ؟

(مع التوتر الذى ازداد يظهر السيد العجان عند الباب)

مخرجاً فتخفى النسوة وجوههن • • يتردد قليلا ثم يقول (

العجان : سلامو عليكم • ولا مؤاخذة • هو يوسف ماجاش
عندكم ؟

عيشة • يا معلم • فيه حاجة ؟

العجان : آه • أصل معايا الخواجة المالطى بيدور عليه من الصبح

عشان يصالحه (يلمح عزيزة فيبتسم لها) مبرك

يا عروسة •

عزيزة : الله يبارك فيك •

العجان : طب لو يوسف جه قولوا له السيد العجان حيسنظرك
العصارى فى قهوة القزاز الى جنب قسم اللبان • سلامو
عليكم (ويخرج) •

المغنواى : أنا قلبى مش مطمئن لحكاية المالمطى ده •
عيشة : (بفرع) ليه ؟

المغنواى : مش داخل دماغى ان المالمطى بيدور عليه عشان يصلحه
يصلحه ؟!

وده برضه معقول ؟

عيشة : أمال عشان ايه ؟ (عزيزة تقترب منها وقد بدا عليها
الخوف) •

المغنواى : بالمخ كده بيدور عليه عشان ينتقم منه عشان العاقبة
الى اكلها •

عيشة : يامصيتى • والمعلم سيد مش عارف كده •

المغنواى : المعلم سيد ده باين عليه راجل ولا مؤاخذة على نياته •
أهمل يعنى • اسألونى أنا على الأجانب • دول ناوين على
مصيبة •

عزيزة : انت ياراجل انت قصدك ايه بالظبط ؟ عمال تقول علينا
من الصبح ليه ؟ (المغنواى ينظر اليها بجمود) سيبك
منه ياعيشة ياخى • يوسف يقدر يغلب عشرين زى
المالمطى •• ياللا ياللا بينا ندخل نكمل (وتجذبها لكن
عيشة لا تتحرك وعزيزة تود أن تهدأ الموقف بأى ثمن)
طب خليكى انتى وأنا أجيب الحاجات من جوه (وتتوجه
هى الى الداخل تتبعها فهيمة وهى تنظر الى عيشة بسخط •
يواجه المغنواى نظرات عيشة النارية فينسحب مسرعاً الى

الداخل ٠٠ بينما تعود عزيزة من الغرفة الداخلية ومعها
مجموعة من الأمشاط تناولها لعيشة متوددة)

عزيزة : على رأيك ٠ هنا طراوة عن جوه ٠٠ مش كده ولا ايه ؟
عيشة : (وهي تضع المشط في شعر عزيزة وتجذبه بقوة) ايه ٠
عزيزة : (تتأوه) آى آى ٠ شعري ياعيشة ٠

عيشة : (أصبحت عصبية جدا) عشان ينفرد شوية ٠ استنى
كده (ثم بلهجة شريرة) لازم العريس يشوفه ناعم يا حبة
عيني ٠ على الأقل الليلة دى ٠ ماهو المهم كله فى الليلة دى
عزيزة : ايه الكلام ده ؟

عيشة : (مستمرة فى احراجها) عارفة ؟! آهو انتى بقى لو جدعه
عمرك ما تخليه يعرف ان كان شعرك (وتركز على الكلمة)
خشن ولا ناعم ٠ عارفة ؟! دى انتى كمان تقدرى تخليه
يبقى بين ايديكى زى الأعمى ٠٠

عزيزة : (تقاطعها بتوتر) عيشة ٠ اعملى معروف ٠ مش عاوزه
أسمع الكلام ده ٠

عيشة : (راضية بأنها أخرجتها) جرى ايه يا شابة ؟! احنا
حنتكسف من دلوقت ٠٠ طب استنى لما أحكى لك على اللى
حصل معايا ليلة امبارح ٠

عزيزة : (تهب واقفة) مش عاوزه أسمع ١٠

عيشة : ده قاللى كلام ! والى أحلى بقى من الكلام ٠٠

(يقترب صوت أقدام خيل تركض بالخارج ٠ فى نفس
اللحظة تخرج فهيمة قائلة بلهفة) ٠

فهيمة : مش ده حصان يوسف ؟

عزيزة : (قررت مواجهة عيشة) لا ٠ مش هو ٠

عيشة : واننى ايش عرفك ؟

عزيزة : أصل عارفة حسان يوسف كويس .

عيشة : (منفجرة) ماتفهمينى انتى حاطاه فى دماغك ليه ؟ هه ؟

عزيزة : (بعناد صبيانى متصاعد) ابن عمى وأنا عارفاه وعارفة
حصانه .

عيشة : (صارخة) فيه عروسة الليلة دى دخلتها تعمل الى
بتعملية ده ؟ ياشيخه ده حتى ربنا ما يباركش فى جوازتك .
مالك انتى ومال حسان جوزى ؟! هوه عرينسك ما عندوش
حسان زيه ؟

(تفك ضفيرتها بعصبية مطلقة شعرها الطويل) انتى عندك
شعر زى ده ؟ (صوت أقدام الخيل تتوقف بالخارج) .

فهيمة : (سعيدة بالمعركة) ايه ياعيشة ايه ياعيشة ؟ ايه الى
بتقوليه ده جاتك نايبة .

عزيزة : (بهدوء مصطنع) أصلها فاكراى حاطة عينى على جوزها .
يعنى ما كانتش جاية محبة ولا قصدها تساعدنى لله
فى لله .

(ولعيشة) أنا عرفت ان ده مش حسان يوسف ياعيشة
علشان ده حنطور جوزى أنا .. أبو حصانين . أصلنا
ياحببتى متفقين ييجى ياخدنى فى الحنطور الخصوصى
بتاعه (وباحتقار) ألا قولى لى ياعيشة .. ازاي جوزك يبقى
عربجى حنطور قد الدنيا ويخليكى تيجى فرح بنت عمه فى
عربية كارو ؟!

(تدخل آسيا وفى يدها حقيبة أنيقة وقد اتخذت زينتها
تحت البرقع) .

آسيا : انتى لسه ماخلصتيش زواقك يا عروسية ؟ (وتخلع برقعها) .

عزيزة : حالا يانينتى (بلهجة ذات معنى لعيشة) مش ناوية تكمل جميلك يا مرات ابن عمى ؟

آسيا : (مجفلة) مين دى ؟

(ويكون راجى قد دخل الآن) .

عزيزة : دى مرات يوسف ابن عمى . ما هانش عليها تسيبني أفرح في يوم زى ده لوحدي . ما تسلمى على حماني يا عيشة .

عيشة : (تمد يدها لآسيا بتردد) ازيك يا نينتى ؟

آسيا : (تتجاهل يدها مغممة) بخير .

راجى : (يمد يده بسرعة ليصافح يد عيشة الممدودة) أهلا وسهلا

عيشة : (تتجاهل يده بدورها مما يربك الشاب) بخير .

راجى : (يحاول أن يبتسم) ياللا بينا يا جماعة . العربية تساعنا كلنا .

(ولعيشة بأدب) اتفضلى يا مدام .

عزيزة : (بسرعة) ولا انتى تلاقيكى تعبتى وعاوزة تروحي ؟!

زى بعضه يا حبيبتي . كتر خبك لحد كده . والنبي ياراجى

تخللى الحنطور بتاعنا يوصلها الأول لحد بيتها .

أصلها لازم تحضر الغدا لجوزها .

راجى : (هامسا لها) أيه الكلام ده ؟ انتى كده بتكرشيها .

عيشة : (بلهجة ذات معنى لعزيزة) متشكرين . أنا زهقت من

ركوب الحنطور بتاعنا . أصل بقى لى سنة وأنا راكباه .

أنا حاضري رجلياً . كرم ، الدكة مش بعيد (وتخرج دور أن
تحيي أحدا) .

راجي : هوه أيه الى حصل بينكم ؟ فيه أيه يا نينة ؟
آسيا : (منفجرة) والله ما أنا عارفه أيه الى جاب المصيبة دى عنا ؟
(ولعزيزة بشماتة) انما انتي عجبتيني .. هزأتها وهزأتني
جوزها .

عزيزة : (وهي تمضي الى الداخل مسرعة) عن اذنكم شوية .
راجي : طب بس ما تتأخرين . النهار بيحرق (ولفهيمية) آمال
فين عمي ؟

فهيمية : نزل كرم الدكة يعزم صحابه . حيثغدوا هنا وبعدين
يجيبهم وييجي الغيط عا المغربية .

راجي : طب ما غيط العنب فيه أكل يكفى بلد بحالها .
فهيمية : تقول أيه بقي ؟ راجل مجنون وعقله طاقق . لازم يهد
حيل طول النهار في المطبخ زى عوايده .

راجي : الله يقويكي يا عمتي (ولعزيزة التي عادت) جهزتي نفسك
فهيمية : (بلؤم) انتي كنتي بتعيطي يا عزيزة ؟ يا ترى ليه ؟
آسيا : ليه ؟ بيت ابوها وصعبان عليها فراقه . عيطي يا اختي
زى ما انتي عاوزة (تمضي فهيمية الى الداخل وهي تمصص
بشفتيها) .

(يدخل الشيخ سليمان في حالة عصبية شديدة) .
سليمان : ما حدش فيكم شاف يوسف جاي من سكة القبارى
يا جماعة ؟

عزيزة : (تنفجر مخاوفها المكبوتة) ليه ؟! حصل أيه ؟!

سليمان : أصل .. أصل أنا كنت باعثة محطة الركاب القديمة
من الصبح علشان يجيب لى جواب مهم قوى .

عزيزة : (وهى ترتجف) ده المعلم سيد كان هنا من شوية وسأل
عليه كان بيقول ان فيه واحد مالطى عاوز يصلحه .

سليمان : يصلحه ؟ ! يصلحه مين يا ست ؟ ! ده داير بخططور
سيد العجان على البارات وفى كل بار ينزل ويسأل على
يوسف ويدلق له شوية هباب فى بطنه ويلف تانى . وناس
سمعوه بيبرطم مع نفسه ويقول ده آخر يوم فى عمرك
يا عريجي الكلب .

(ويكاد يبكى) ويوسف معاه جواب مهم قوى ولازم يوصله
الليلة .

راجى : (راجى ينقل البصر بينهم جميعا محتارا) أية الحكاية
ما تفهمونى .

سليمان : بعدين . بعدين يا سى راجى (ويتحرك نحو الباب قائلا)
المهم دلوقت لو حد منكم شاف يوسف يقول له يلف عن كوم
الدكة ويقابلنى يا فى السبع بنات يا عند القائمقام سليمان
سامى فى باب شرقى .

راجى : (يستوقفه متوترا) أية أية ؟ ما تفهمنا فيه أية ؟

سليمان : (مخلصا نفسه منه بعصبية) فيه مؤامرة . مؤامرة بيدبرها
عمر لطفى مع الأجانب والعربان (ويخرج مسرعا) .

عزيزة : مؤامرة ؟ (وتشترك وراء سليمان لكن آسيا تمسكها بشدة)

آسيا : مؤامرة ولا مش مؤامرة . احنا عندنا فرح الليلة دى ومش
ناقصين بلاوى .

عزيزة : بس ده ابن عمنا برضه (وتخلص نفسها منها متجهة از
راجى) مش كدة يا راجى ؟

راجى : أيوه .. بس ...

عزيزة : بس أيه ؟! انت لازم تروح له . لازم تدور عليه وتحذره ،
لازم تبعده عن كوم الدكة .

آسيا : (تجذب اليها ابنها بعنف) لا . ابني ما يدخلش نفسه
فى مشاكل من دى . كان حد قال لابن حجازى يعمل جندع
ويضرب الحواجة ؟!

عزيزة : يعنى انتى عارفة سبب العركة ؟! وانت كمان عارف يا راجى ؟
آسيا : احنا مالناش دعوة بالحاجات دى . خلينا فى حالنا . هيه
المشاكل دى بتخلص ؟ ياللا ياللا بينا (وتدفعها) زمان
المعازيم وصلوا .

راجى : (بخجل) ياللا يا عزيزة .

عزيزة : (بدهشة) وتسيب الغريب على ابن عمك ؟

راجى : (منفجرا) آمال أسيب الفرح والمعازيم واروح اتعارك مع
الحواجات علشان سى يوسف ! طب ده انا حتى ما اعرفش
شكلكه بقى أيه دلوقت ؟ ثم ان الشيخ سليمان حيدور عليه
ويحذره (تدخل فهيمة وشعرها منكوش ويدها ملطختان)

آسيا : آه . عثمان كده الشيخ سليمان كان عاوز ياخذ الطبنجة
بتاعتى (تخرج الطبنجة من حقيبتها تربت عليها بوحشية)
بس ده بعده . ده انا شارياها ودافعة فيها دم قلبى عثمان
أحمى بيها نفسى وابنى . مش أحمى بيها ابن حجازى اللي
قتل جوزى !

فهيمة : (تهجم عليها تريد انتزاع الطليحة) وانتى جايباها
معاكى هنا ليه ؟ مش انتى حتاخدى عزيزة على سنة الله
ورسوله ؟ ولا انتى خايقة ما ترضاش تروح معاكى بالذوق
تاخديها بقوة السلاح ؟!

آسيا : كلام أيه يا ولية يا مجنونة الى بتقوليه ده ؟
عزيزة : (لراجى) بلاش علشان يوسف ابن عمك . طب علشان
شهم . راجل جدع يا أخى .

آسيا : سيبى ايدى يا ولية .
عزيزة : هوه مش كان بيحامى عن كل راجل فى البلد لما ضرب
الحواجا .

راجى : (مخلصا أمه من يد فهيمة بقوة) ده تخلف .
عزيزة : (بفجعة) هوه أيه الى تخلف ؟

راجى : الى كلكم بتعملوه ده .
عزيزة : والى عمله يوسف ؟
راجى : برضه تخلف .

عزيزة : ده الى اتعلمته فى أوروبا يا راجى ؟
راجى : (يواجهها) أيوه . فى باريس العشاق مالين الشوارع
والخناطير وما حدش ببيجى جنبهم . دى حرية شخصية .
عزيزة : (تتأمله بفجعة) حرية شخصية ؟!

راجى : طبعا حرية شخصية . كان لازم يوسف يعمل نفسه
مش شايف والحكاية كانت عدت بسلام .

عزيزة : (تتراجع الى الخلف مذهولة) وعاوزنى أبقي هراتك ؟
(يدخل دسوقى مسرعا مذهولا وهو يلث بشدة) .

دسوقي : شفتم الى حصل ؟

فهيمة : أيه ! حصل أيه ؟

دسوقي : واحد خواجه مالطى قتل المعلم سيد العيجان وهرب .
وواحد من العربان قتل المدرس بتاعك يا عزيزة والبلد
هايجة والخلق بتدبح فى بعضيها (عزيزة ترتعش بشدة)
كوم الدكة ولعت (ويدخل مسرعا الى غرفته بينما ترقع
فهيمة بالصوت) .

فهيمة : يا مصيبتى يا خرابى . أدى أول حاجة اتحققت فى حلم
الليلة الى فانت . أوله فى كوم الدكة وآخره فى غيط
العنب .

(يسمع صوت ركض حصان قادم من بعيد) .

عزيزة : (تغمغم بذهول) آهو ده حصان يوسف (وفجأة تندفع
للخارج صارخة) أنا مش حا اسيبهم يموتوه .

آسيا : أيه ده ؟ رايحة فين يا بت ؟ ارجعى يا مجنونة .

راجى : عزيزة .

فهيمة : (تهجم عليه تتشبث به) انت عاوز تاخذها بالسلاح
يا ابن آسيا ؟

آسيا : (بقوة) الحقها قبل ما تروح . استنى (تعطيه الطبنجة)
خد دى معاك .

راجى : سلاح أيه يا عمتى سيبينى .

المغنواى : (الذى كان قد عاد من الداخل وراح ينظر من النافذة)
الله .. دى عزيزة بتجرى ورا يوسف (ويخرج مسرعا الى
الطريق) .

راجى : يا عمتى سيبينى باقول لك .

فهيمة : (تزداد تشبثا) أنا ما اسبيكش الا لما ترجع السلاح لامك
الشرائية (آسيا تحاول أن تخلص ابنها من فهيمة حين يعود
دسوقى) .

دسوقى : أيه الى بيحصل ده ؟ هو أنا غلطت فى حاجة ؟
آسيا : سيبي الولد يا ولية يا مجنونة خليه يرجع عروسته ..
ملكه .

فهيمة : ملكه ؟ ليه ؟ هيه رخره غيط العنب يا ادلعدى ؟
راجى : باقول لك سيبينى . انتى مش فاهمة أنا عاوز أعمل أيه
فهيمة : عاوز تقتلها وتقتله .

دسوقى : (هاجما على راجى) يقتل بنتى ؟! ده أنا كنت أشرب من
دمه .

راجى : يا عمى انت فاهم غلط .. دى حرية شخصية .
آسيا : (تضرب دسوقى بعنف) ده بدل ما تشرب من دم بنتك
الفاجرة ؟

دسوقى : أشرب من دمها ليه يا عالم ؟ هيه عملت أيه ؟
آسيا : هربت مع راجل غير عريسها يا سبع البرمبة .
دسوقى : (مترنحا) كلام أيه يا وليه يا خرفانة ؟

آسيا : اخرس يا دلدول يا بو قرنين . معلوم ما دام سايبها من
صغرها فى الشوارع زى الغوازي (ولراجى) أنا غلطانة الى
طاوعتك يا مدهول انت وخطبتها لك .. بتقول حرية
شخصية يا روح أمك ؟! ما انت لو كنت اتربيت فى الصعيد
كنت طلعت راجل وجريت جببت لى راس لتنين على طبق قبل

المغرب • أيوه أيوه اعمل نفسك مش فادر تخلص روحك
من ايده عمتك المجنونة • يا خسارة يا ولاد ! أنا برضه
غلطت زيك يا دسوقي • انت ما عرفتتش تربى البت وأنا
ما ربيتش راجل (تهجم هي الأخرى على راجي) ادني
الطينجة اخلى حد من قرايبي الرجالة هوه اللي يتصرف بيها •
غيط العنب لازم يشرب من دم العروسة الفاجرة •

فهيمة : سيبه يا ولية يا صعيدية يا مجنونة • هيه الزبونه طلعت
خلاص ؟

دسوقي : (هاجما عليهم هو الآخر) هات السلاح يا ابن عثمان
أحسن لك •

راجي : (فجأة يخلص نفسه منهم جميعا قافزا بعيدا) أيه ؟! أيه
الى بتعملوه ده كلكم ياهميج ؟ واحدة تقول لي اشرب من دمهم
وواحد يقولي لي اشرب من دمك (ولآسيا) وانتى ؟ عاوزة
أيه انتى رخره ؟ أقعد جنبك زى الولايا ؟ طب مش أنا صاحب
الموضوع ؟ مش أنا اللي قارى فاتحتها ؟ خلاص •• العقل
بيقول أيه ؟ بيقول أنا بينى وبينها خطبة • وهيه من حقها
تفسخها • صحيح دى حريتها الشخصية • بس أنا كمان
ليا حق ولازم آخده (وبصوت أهدأ) و •• ومش يمكن هيه
راحت له عشان تحميه ؟

آسيا : (ساخرة) تحميه ؟ وليه حتحمي راجل من الأجانب الى
واقفين له بالسلاح ؟

راجي : ممكن يكون ده تفكيرها • وهيه حرة فى تفكيرها • الحرية
كده •

آسيا : حرية يعنى أيه ؟ انت عليك عفريت اسمه حرية ؟!

راجى : (بقوة) أيوه • وإذا كانت عاوزة تتجوز يوسف وهو
عاوزها فأنا موافق • أنا ابن عمها وابن عمه ولازم أقف
جنبهم • احنا كنا عيلة واحدة ولازم نحب بعض ونسامح
بعض •

فهيمة : (صارخة فى وجهه) انت عاوز تضحك علينا بكلمتين يا ابن
آسيا ؟ اذا كنت عاوز تحبنا بصحيح يبقى غيط العنب لازم
يتقسم علينا بالعدل •• زى الشرع ما بيقول •
آسيا : (تهجم عليها كالمجنونة) وعامل لى نفسك مجنونة يا بنت
المقرمين ؟!

فهيمة : أقمى عندك يا آسيا • غيط العنب ده مش بتاعك لوحده •
ده بتاعنا كلنا • انتى اشتترتيه بفلوس أبونا الى خدها جوزك
عافية ••• وكفاية الأخين الى راحوا بسبب الى حصل •
راجى : (يعطى الطينجة لأمه) خدى يا نينة • دى جاز تنفك انتى
أما أنا فرايح أجيب الولد والبنت وبعدين نشوف حكاية غيط
العنب مع بعض •

آسيا : (تصيح وراء وهى تكاد تجن) ليه ؟ وانت كنت ورثته
ياروح أمك • ده أنا عندى أشوفك متمرغ فى دماك قبل
ما اشوفك بتوزع أملاكى على عيلتك الدون • أنا راحة غيط
العنب والراجل فيكم يستجرى ناحيتى يا عيلة القمحاوى
يا مجانين (تخرج) •

دسوقي : (ذاهلا) أبه الى شعلل النار دى كلها ؟!

فهيمة : ما هى كان لازم تشعلل من زمان •

دسوقي : وراحت فى عزيزة دالوقت ؟ فهمونى يا عالم • أنا عقل
حيطير •

المفنواتى : (عائدا) خدها على حصانه وطار •

دسوقى : (صارخا فى ألم) أُمال كانت بتقول ليه مش عاوزه
بنت الكلب ؟!

فهيمة : (بنشوة) آهى تقعد معاه ان شاء الله ساعة زمن .
دسوقى : طب وأنا كنت مش راضى أجوزها له يا ناس ؟! ليه كده
يا عزيزة ؟! عملت أيه انا عشان استاهل عليه الفضيحة
دى كلها ؟

فهيمة : (بقسوة) عملت ؟! عملت شرابة خرج يا طيشة .
ما رضىتش تقول حقى لما كل حاجة راحت منك .
(وتنتحى جانباً وهى تردد) كل ده شفته فى الحلم . ولسه .
لسه دور غيط العنب . لا . كوم الدكة وبعدين غيط
العنب .

المغنواتى : (يردد) زى العصافير كلهم جوه ايدى .
وايدى صياد محترف

فهيمة : (فى حالة وجد) كل ده شفته فى الحلم .
المغنواتى : من رقابهم . سكينتى طالعة من رقابهم حرف

فهيمة : كل ده شفته فى الحلم .

المغنواتى : يطرطشوا بالدم .

أشرب وأشرب وأشرب

من عروق النصف

فهيمة : كل ده شفته فى الحلم

المغنواتى : (صائحا) كمل . كمل كلامك يا شاعر الجن كمل
(تقع فهيمة مصابة بحالة الصرع)

الفصل الثالث

قبل فتح الستار ، يسمع صوت الغنواتي يردد موالا :

مدبوح فى أرض البياضه
مرمى فى سوق السمك
مضروب أنا بالرصاصه
غرقان فى دم البرك
مسجون ، وأنا فى السياسة
معرفش غير اسمك
عينى يا ليل آه وآه ياليل يا عين
حطيت على كنفى
الفين مشنة حب ، ما تكفى
ورحت غيط العنب
مادد اليه كفى
لقيته ملك الغريب

ممنوع أنا والفي
سألت ايه السبب
والدمع مالييني
قاللى عصير السنين :
ناسك ما بتصفى

يفتح الستار على المنظر الأول

حارة بجوار قسم اللبان •
مجموعات من الأهالى والأجانب واقفون متربصين ببعضهم فى
توتر عنيف يتسابون بمختلف اللغات واللهجات •
جون نونيه عميد الجالية السويسرية يتقدم من ضابط
البوليس الشاب الواقف بجوار القسم •
تسمع أعيرة نارية تطلق من بعيد •
نونيه : من فضلك • أنا ضرورى أقابل قنديل بك
الضابط : للأسف يامسيو •• قنديل بك عيان ونايم فى بيته من
امبارح

نونيه : غريب جدا أن يمرض مدير أمن عام فى يوم كهذا
(فجأة ينهمر رصاص من جهة قريبة تجاه الأهالى الذين
يصرخون ويجرون هنا وهناك • الضابط يجذب مسيو نونيه
داخل القسم يخلو الطريق الا من الأجانب الذين يتشاورون
فيما بينهم بعدة قليل يعبر رجل مصرى الحارة ويده مسبحة
يحرك حباتها فى عصبية ، يسأل أحد الحواجات محاولا أن
يبتسم)

الرجل : فيه ايه يا حضرة ؟

الحواجة : انتى موسى يعرف فيه ايه ؟ فيه ده يا خبيبي

(يقولها وهو يطعنه بسكين استلها بسرعة)

الرجل : (يعدو تجاه القسم متأوها) الله ؟! ده قتلنى ! الحواجة

قتلنى .. قتلنى يا مسلمين

الضابط : (خارجا من القسم يتابع القاتل الذى يعدو وورائه ثلة

الاجانب .. خلف الضابط يظهر عسكري بوليس . الضابط

يشير اليه هاتفا) اجرى وراه يا عسكري . لازم تمسكه (المطعون

يجرى متأوها)

العسكري : (وهو رجل بدين جدا .. يجرى بتكاسل وضعف)

حاضر يا فندى

توفيه : (يخرج من القسم قاتلا للضابط) حضرة ضابط افندى

الضابط : (يصرخ فى العسكري) مش المضروب يا بنى آدم . اجرى

ورا الحواجة .

العسكري : (يغير اتجاهه مدعنا) حاضر يا فندى .. اللهم طولك

يا روح

توفيه : فين عساكر حضرة ضابط افندى ؟

الضابط : زى ما انت شايف يا جناب القنصل . ما عايش فيه غير

واحد معايا . كل حارة ييجى منها بلاغ ابعت لها عسكري

واتنين يروحوا ما يرجعوش . بقى لنا ثلاث ساعات على

الحال ده .

(وناظراً الى قمة الحارة .. يتنفس الصعداء هاتفا) الحمد لله .

آهو سعادة المحافظ بنفسه آهو .

نونه : عمر بك لطفى ! عظيم عظيم .

(ويتوجه لمقابلة المحافظ فى منتصف الطريق .

ويلاحظ أن عمر لطفى يرتدى ثيابه المدنية وخلفه ثلاثة من
عساكر البوليس وبعض العربان)

نونه : عمر بك . ما سبب عدم إيقاع هذه المذبحة عمر بك ؟

عمر : تصور يا مسيو نونه . المستر كوكسن قنصل بريطانيا .
الأهالى ضربوه وكانوا جيموتوه . اضطريت استنى معاه بنفسى
لحد ما وصلته المستشفى واطمأنت عليه . أعمل ايه لوحدى
فى المصايب دى كلها ؟

نونه : (ينظر اليه بشك) صديقى البروفسير ايزاك . قتل عمر
بك ، واحد من عربان هؤلاء أطلق رصاص عليه

عمر : ده مش صحيح يامسيو نونه . أنا عملت تحقيق بنفسى
وقبضت على القاتل . ولد من رجالة عرابى هو اللى

نونه : (يقاطعه باحتقار) ضع نفسك فى ملابسك الرسمية
عمر بك وخذ خمسين عسكرى من بوليس ال . . سوارى .
وكل شىء يتوقف حالا .

عمر : أنا طلبت ده من الحكمدار قنديل بك . انما للأسف لقيناه
عيان .

نونه : أعلم ذلك عمر بك . اذن أطلب من جيش مصرى يتدخل

عمر : لا بقى . جيش مصرى ايه اللى يتدخل . . انت مش عارف
دول عاوزين ايه

نونه : أنا أعرف شىء واحد عمر بك . . أى دولة متحضرة لازم
مستولين فيها يوقفوا هذا بأى وسيلة . . أى وسيلة عمر بك

عمر : (زافرا بضيق) حنوقفها يا مسيو نونيه . اطمئن انت خالص .

نونيه : أنا غير مطمئن . غير مطمئن اطلاقا . لازم برقية لعرابى باشا .

عمر : (بضيق شديد) اسمع بقى يا مسيو نونيه . انت دخلك ايه باللى بيحصل ده ؟ أنا مسئول عن سلامتك الشخصية . اتفضل تعالى معايا أوصلك لحد السرايا . . بنفسى .

نونيه : أنت غير مسئول عن سلامتى الشخصية فقط . أنت مسئول عن سلامة بلدك (المحافظ يشيخ بوجهه . . مسيو نونيه ينظر اليه باحتقار شديد) باذنك عمر بك (وينصرف غاضبا) .

عمر : (صائحا وراءه) فى سنتين داهية . راجل خشرى

(يقترب منه أحد الأفندية يحييه باحترام شديد)

الأفندى : تمام يا سعادة الباشا

عمر : بعث التلغراف يا عارف ؟

عارف : أيوه يا سعادة الباشا . . بالحرف (ويستظهر مضمون البرقية) « نفذت » نصيحتكم بأن أطلب جنودا من الأسطول البريطانى ، ولا أطلب جنودا « مصريين » .

عمر : أوعى تكون بعث التلغراف ده مفتوح !

عارف : عيب يا سعادة الباشا . ودى تعدى عليا . طبعاً شفرته

عمر : (يتنهى مرتاحاً) عفارم عليك يا عارف افندى . أنا فى لهوجتى نسيت أنبهك ، انما انا كنت واثق انك حتتصرف صح .

عارف : خدامك يا معالى الباشا
عمر : ابقى عدى عليا بكرة فى مكتبى علشان .. علشان اشكرك
عارف : (منحنيا بشدة) ربنا يخليك يا معالى الباشا (وينصرف سعيدا)
(يظهر بعض الأجانب فى نهاية الطرق ، فيقترب أحد العربان من عمر لطفى هامسا)
الاعرابى : أطف عليهم بالنار يا باشا
عمر : (هامسا) طيب . بس لما أمشى أنا الأول . انت فاهم يا جويدة مش قبل ما أمشى أنا من هنا
(وملفتنا الى ضابط البوليس الواقف بعيدا عنه تأدبا)
أظن الحالة هديت دلوقت يا حا الضابط ؟
الضابط : ازاي يافندى !؟ ده لسه واحد مضروب بسكينة فى صدره .
عمر : (بغلظة) هوه فين ؟ أنا مش شايف حد
الضابط : أصله خاف من الحواجات قام جرى قبل حتى ما نطلب له الاسعاف
عمر : (صائحا) تبقى تعويرة بسيطة . انتم كل حاجة تهولوها كده ؟ اسمع .. أنا ماشى دلوقت . ولو فيه تستدعى (ومركزا على الكلمة) تستدعى ! ابقى بلغنى بيها فى قسم الجمرك .
الواحد مش عارف يعمل أيه أكثر من كدة ؟ محافظ وحكمदार ومأمور وكل حاجة لوحدى فى البلد الزفت دى (وينصرف مدعيا السخط والتأفف . يستدير الضابط متوجها الى القسم . وما أن يفعل حتى يطلق الاعرابى النار على جمع

الأجانب فيسقط أحدهم قتيلا • يرفع زملاؤه جثته وهم
يصرخون والاعرابي يعدو ووراء زملاؤه •

تسمع طلقات رصاص هنا وهناك • يظهر يوسف وعزيرة (
عزيرة : (خائفة) وبعدين ؟ احنا اتزقنا هنا • لا عارفين نعدى
ولا نرجع
يوسف : (فى عصبية) أنا الى مش عارف ازاي طاوكتك وجبتك
معايا

عزيرة : كان لازم آجي معاك عشان احميك

يوسف : أيوه يا جدعان ! انتي برضه الى تحميني ؟! انتي مش
عاوزه تفهمي ان أنا الراجل ؟ (تنطلق رصاصات فيعدوان
يحتميان بباب الجامع القريب • واضح طبعا أنه حريص على
حمايتها بجسمه) •

عزيرة : شفت ازى • آهو طول ما انا معاك مش حتقدر تسيبنو
وتروح تتعارك

يوسف : يعنى عاوزانى انشغل بيكي واسيب تارى مع الى قتل
المعلم سيد ؟

عزيرة : يا يوسف الموضوع مش موضوع تار ؟ ما هم قتلوا البروفسير
اسحق •• دى مؤامرة من الأجانب والحدوي • عاوزين
يستفزوكم عشان تبقى حريقة والانجليز يدخلوا

يوسف : (نافخا بشدة) اللهم سوقك يا شيخ سليمان (وملتفتا
اليها هامسا من بين أسنانه) تقومى تسيبى فرحك وتلبدى
لى بالشكل ده ؟ الناس يقولوا علينا ايه ؟

عزيزة : (هامة مثله وهى تلهت) يقولوا الى يقولوه . أنا عملت
الصبح . تمام زى ما قالى البروفسير .

يوسف : مين البروسير الى قلبتى دماغى بيه من الصبح ؟

عزيزة : (تسرح ببصرها) كان عاوز يموت هنا . . وآهو عملها !
يوسف : وانتى عاوزه ايه دلوقت ؟

عزيزة : حا افضل ماشية وراك لغاية ما تعقل وترجع لمراتك وابنتك
يوسف : تقومى تسيبى عريسك فى ليلة الفرح ؟!

عزيزة : أنا خلاص . مش حاتجوز . أنا حافضل أعلم البنات لغاية
ما أموت .

يوسف : (يرتعد) كلام ايه ده يابت ؟ (يحدق كل منهما فى
الآخر بذهول . يقترب أحد الحواجات منهما ويبيده سكين .
يراه يوسف فيصرخ) عزيزة ! المايطى آهو . المجرم النجس .
استنينى انتى هنا وأنا راجع لك حالا .

(تحاول هى أن تتشبث به لكنه ينتزع نفسها منها بعنف
بينما يخرج سكيناً من جيبه ، وأثناء صراعه معها يسقط منه
« الخطاب » دون أن يشعر . يعدو هو ناحية المايطى .
تلتقط هى الخطاب وتحاول أن تعدو وراءه ، لكنها ما تلبث
أن تعود يائسة من اللحاق به)

عزيزة : ياترى فيه ايه الجواب ده ؟ أنا كنت سامعه الشيخ سليمان
بيقول انه جواب مهم . . أفتحه ؟ آه لازم أفتحه يمكن فيه
حاجة لازم تتعمل . بس ده مختوم بالشمع الأحمر !
(تضعه فى صدرها) على الله يرجع قوام وأنا أخليه يتصرف
دى مصيبة ايه دى الى احنا فيها ؟!

(يتقدم جمع من الأهالي حاملين نبايت وسكاكين وهم
يصيحون « جاى يا مسلمين » فيقابلهم جمع آخر من الأجانب
تدور معركة عنيفة .. وعزيزة تحاول أن تتجنب المعركة .
يدخل عساكر بوليس يفضون الاشتباك بالعصى وهم يطلقون
الصفارات بأشراف الضابط . يعدو المتشاجرون بعيدا وهم
يجرفون معهم عزيزة التي تصيح : يوسف . الحقنى
يا يوسف .. حتى تختفى . العساكر يتوجهون ناحية
القسم . بعد قليل يعود يوسف من حيث أتى وهو يلهث
بشدة والدم ينزف من رأسه .. يلتفت حواليه هنا وهناك
وينادى)

يوسف : عزيزة .. عزيزة (يتوجه ناحية العساكر يسأل
أحدهم) والنبي يا شاويش .. ماشفتش بت كانت واقفة
هنا من شوية ؟

العسكري : بت ؟! لا يا أسطى ماشفتش بنات . احنا فى آيه ولا فى
آيه ؟

يوسف : دى بت عمى ياشاويش .

العسكري : طب وأنا كنت حاعملمها آيه بت عمك دى ؟ ! أصرها
فى منديل وأشيئها لك فى جيبي ؟! ياللا انجر شوف لك حنة
اتدارى فيها (ويدفعه فى صدره بغلظة) ياللا انجر خلى
اليوم الاسود ده يعدى

(يتراجع يوسف ذاهلا . يقبل الشيخ سليمان من أول الحارة
فيعدو كل منهما ناحية الآخر بلهفة)

سليمان : يوسف . الحمد لله اللى لقينتك

يوسف : شيخ سليمان . ماشفتش عزيزة ؟

سليمان : عزيزة ايه يا بني ؟! انت اتجننت ؟ ماهي في الفرح بتاعها .. قوللي .. فين الجواب الي اداهولك الشيخ ابراهيم ؟

يوسف : (ذاهلا) جواب ؟! عزيزة تاهت مني يا شيخ سليمان

سليمان : ياراجل هات الجواب قوام اعمل معروف . ده عليه امضة عرابي باشا يا جاه المصطفى .. اوعى كده (يفتش جيوب يوسف بلهفة وهو يقول) هيه جوازة عزيزة طيرت عقلك يا جدع ؟

(يخرج السكين فقط . يتوقف عن البحث ناظرا اليه بذهول)

فين الجواب يا يوسف ؟!

يوسف : (مذهولا هو الآخر) الجواب ؟! كان في جيبي

سليمان : (لاطما على وجهه) وراح فين الجواب يا يوسف ؟!

يوسف : لازم .. لازم وقع مني وأنا باطلع السكينة دلوقت آهو (بأمل مفاجيء) ضروري بقي عزيزة لقيته وشالته معاها

سليمان : (يشق جلبابه) يادى المصيبة السوداء عليكى يا بلد ! فيه حد يتجنن فى وقت زى ده ؟!

يوسف : (يتمالك نفسه) يا شيخ سليمان أنا مش مجنون . انت فاكرنى اتجننت . الي باقول لك عليه حصل . عزيزة قابلتني قدام بيتهم وأنا جاى من القبارة ، وقالت لى على الي حصل للمعلم سيد . وكمان قالت لى انك حتكون موجود فى السبع بنات جيت عشان أقابلك هنا زى ما قالت .

سليمان : يا سلام على كلام العاقلين . وايه جابها معاك ست عزيزة وفانت فرحها ازاي ياخويا ؟

يوسف : أصلها خلاص مش ناوية تتجوز

سليمان : (يلطم ثانية) يعنى حكاية غرام بقى والبلد بتتحرق

يوسف : (ممسكا بيديه) يا شيخ سليمان لا . والله العظيم ما فيه حاجة من دى . البت افكرت انى رايح أتعارك مع المايطى الى قتل المعلم سيد استموتت على الحصان .. جرجرتها على الأرض وهيه ايدها متخشبة على اللجام وعمالة تصرخ وتقولى دى مؤامرة من الأجانب .. مش انت برضه الى قلت لها انها مؤامرة يا شيخ سليمان (الشيخ سليمان فى حالة عصبية شديدة جدا)

سليمان : حصل . وبعدين ؟! انطق

يوسف : غصب عنى جبتها معايا عشان تقابلك . انما لا غرام ولا دياولو

سليمان : طب وسبتها ليه ؟ ورحت فى ؟ وهيه راحت فى ؟
والجواب راح فى يا يوسف ؟!

يوسف : ما انا .. ما نا .. لحت الخواجه الى قتل المعلم سيد قمت جريت وراه وقلت لها استنى هنا جنب الجامع . ولما ملحقتش الكلب رجعت لقيتها مش موجودة زى ما انت شايف .

سليمان : وايه فائدة ده كله اذا كان الجواب ضاع منك ؟!

يوسف : (بتضرع) جايز ماضاعش . جايز وقع منى وانا باطلع السكينة فى الحنة دى . تلاقيها هيه خدته وشالته معاها

سليمان : (يهزه بعنف) طب وراحت بيه فى ؟ راحت بيه فى ؟!

يوسف : (يصرخ) لازم راحت غيط العنب .

سليمان : (يهزه) غيط العنب ليه ؟ غيط العنب ليه ؟

يوسف : أصل احنا لما كنا صغيرين ونتوه من بعض كان لنا مخبأ
فى غيط العنب ماحدش يعرفه غيرنا .. جنب كوم الطوب
الاحمر .. يقوم كل واحد فينا يروح يستنى التانى هناك

سليمان : (بأمل وليد) يعنى عاوز تقول انها لقت الجواب ؟

يوسف : (بأمل كبير) وراحت بيه على هناك . دى نبية وتعرف
تتصرف

سليمان : انت عارف الجواب ده فيه ايه يا يوسف ؟

يوسف : هوه أنا باعرف أقرا يا شيخ سليمان ؟

سليمان : (بصوت رهيب) فيه أمر من عربى باشا للقائمقام
سليمان سامى بالقبض على عمر لطفى .. عمر لطفى سبب
المصايب دى كلها .

يوسف : (مدهوشا) طب وانت عرفت منين ؟

سليمان : ما الشيخ ابراهيم باشا قابلنى بعد انت ما تأخرت علينا

يوسف : طب وهوه ليه ما وصلوش بنفسه ؟

سليمان : ماقلنا لك عشان متراقب من رجاله الحديوى والمحافظ

يوسف : طب ما تبلغوا القائمقام بتاعكم ده بالى فيه .

سليمان : بلغناه . قال لازم الجواب عشان عليه الامضا ..

يوسف : (منفجرا) ولما انتم عارفين انه جواب مهم قوى كده .

تخلوا واحد جاهل زى هوه الى يتحمل مسئوليته ليه

(يعود سليمان الى عصبيته)

سليمان : عشان كنا واثقين فيك . قلنا ابن بلد ومجدع وعنده

حصان ..

يوسف : (مكملًا بسخرية) وما يعرفش يقرأ • علشان لو كان
بيعرف يقرأ جازي الشيطان يوزه يقوم يفتحه ويقراه ؟! مش
كده برضه يا شيخ سليمان ؟!

سليمان : لا مش كده يا يوسف

يوسف : لا ليه ؟ ما انتم كل الناس عندكم مالهاش طمان
سليمان : أنا •• أنا زى زيك ، بنفذ أوامر

يوسف : طب ليه عرابي ماكانش بيعت جواباته مع حد من
طباطه ؟ أنا أقول لك يا مولانا •• علشان مالوش طمان في
طباطه •• وانتم مالكوش طمان في رجالتكم •• يبقى واحد
زى ما يغلطش ليه يا شيخ سليمان ؟

سليمان : (باضطراب شديد) ما تظلمش عرابي يا يوسف ••
كفاية الى هوه فيه خلى الحساب لبعدين

يوسف : هيه لسة فيها بعدين ؟!

سليمان : ياللا يا يوسف ياللا • احنا اتسمرنا كده ليه ؟
ياللا بينا نروح الحنة الى قلت عليها وربنا يستتر ونلاقي
الجواب (ويحاول أن يجذبه من يده • لكن يوسف ينزل
يده بقوة وهو يتحرك قائلًا في حزم)

يوسف : ربنا يستتر والأقى عزيزة

(وما أن يبدأ التحرك حتى يظهر راجي قادمًا نحوهم من
بعيد)

راجي • شيخ سليمان ، ماشفتش عزيزة ويوسف ؟

سليمان : (جاذبا يوسف حتى لا يتوقف) ياللا يا جدع ما فيش
وقت

واجى : (يتفرس فى يوسف الذى توقف فعلا ليتفرس فى راجى)
انت يوسف (ويتقدم نحوه)

يوسف : (يتقدم نحوه فاتحا ذراعيه) وانت راجى

واجى : (جاذبا اياه من ملابسه بشدة) فى عزيزة يا يوسف .

سليمان : احنا رايعين لها دلوقت آهو ياراجى

واجى : رايعين لها فى ؟ فهمونى ايه الحكاية (ويتشبت أكثر)

سليمان : ياراجى ياراجى . . طب . . طب تعالى معانا ندور عليها
كلنا .

واجى : (صائحاً) تدوروا عليه يعنى ايه ؟ اتم مش عارفين
مكانها ؟!

سليمان : (مهدئا اياه بينما يزداد هو عصبية) لا عارفين . بس
عاوزين نتأكد .

(المالى يظهر متسللا من بعيد يخفى سكيناً وراء ظهره
ويرتدى طربوشاً على سبيل التمويه . لا يلاحظه أحد من
الثلاثة حتى الآن)

راجى : تتأكدوا من ايه ؟!

يوسف : أصل الحكاية . . .

واجى : قوللى الأول هيه هربت معاك ليه ؟

يوسف : أصل الحكاية . .

واجى : أنا عرفت من فهمة انها عاوزاك انت . الكلام ده صح ؟

يوسف : لا . مش كده ياراجى .

سليمان : يا اخواننا فيه حاجة أهم من ده كله (ويحاول أن
يجذبهما)

راجى : اتكلم يا يوسف .. وديت عزيزة فين ؟!

يوسف : انت عاوز تقتلنى ولا ايه ؟!

راجى : (يمسكه من رقبته) ايوه حقتلك .. مش عشان أخذتها منى ، انما عشان ما حافظتش عليها .. ضيعت عزيزة ليه يا يوسف ؟ ما حافظتش على عرضك ليه يا يوسف ؟!

(وهنا يكون المألطى قد هجم بسكينه يريد طعن يوسف فى ظهره ، يلمحه راجى فيدفع بيوسف بعيدا صائحا) اوعى يا يوسف (وهكذا يكون هو من تلقى الطعنة فى قلبه .. سليمان يعدو فى أثر المألطى صارخا : يابن الكلب ! ، بينما يتلقى يوسف جسد راجى المتهاوى بين ذراعيه وهو يصيح مفجوعا)

يوسف : راجى .. رد عليا يا راجى ..

راجى : (وهو يحتضر) يوسف .. لازم ترجع عزيزة .. دى عرضك .. لازم ترجعها .. يا .. يابن عمى .. (ويموت)

يوسف : (محتضنا جسده صارخا) راجى .. أخويا راجى

سليمان : (يعود يائسا وهو يلهث) ده المألطى المجرم .. تانى واحد يقتله النهارده

العسكري : (يقترب منهما) اذا كان مات هاته على القسم عشان نبعثه المشرحة ..

يوسف : (يغطيه بجسده صارخا) لا .. ماما تش .. ده متعور بس .. دى تعويرة صغيرة جنب قلبه ، انما قلبه سليم .. (وهو يبكي بحرقة) قلبه سليم

العسكري : (بلهجة ذات معنى) اذا كان متعور وبس احسن لكم
تودوه بيته بدل البهدلة ياللا اتصرفوا قوام قبيل مالظابط
مايشوفه (فيأخذه الشيخ سليمان جانبا)

سليمان : (ليوسف الذى يرفع راجي) ايه ده ؟! انت كمان متعور
فى دماغك يا يوسف ؟ (ويساعده فى حمل الجثة قائلا)
يعنى حتقدر تتحرك وانت كده ؟

يوسف : أيوه حاقدر . لازم أرجعه بيته . حاآخذه على الحصان
على طول .

سليمان : ده الحصان بتاعك مضروب سكينه فى رقبته راخر
يوسف : ماكلنا مضروبين ياشيخ سليمان . . . انما لازم نمشي
برضه .

سليمان : (يتبعه متوسلا) طب . . . وتقابلنى فى الحقة الى فيها
عزيزة . خللى النار والبكا تبعدين . البلد محتاجة لك دلوقت
انت وعزيزة . الجواب ده ممكن يوقف المذبحة دى يا يوسف
. . . سامعنى ؟

يوسف : سامعك .

سليمان : يعنى أقابلك فىن فى غيط العنب قلت لى ؟

يوسف : فى التعريشة . . .

سليمان : آه . عند الكوم الاحمر ؟

يوسف : عند الترب ياشيخ سليمان (ويختفى فى الحارة المجاورة)

السلام

المنظر الثاني :

التعريشة • بجوارها الكوم الأحمر وبجانبه مقابر مهشمة •

الوقت ليلا والقمر مكنول ينير المكان وتمكس التربة ضوءه الفضي
يظهر ابراهيم التاوى من بعيد منشدا بمصاحبة طبول بدائية وصوت
الجنادب

التاوى : طالع .. أنا طالع

زى اللهيپ .. والى

صوت الشوارع دم

صوت الجنائين دم

جى الجميل عندى

صبارة فى يدو

صبارة فى يدى

وأنا الى قلبى رخام

لا آخذ ولا بدى
مطر الشهاب عيني
تلج الشتا خدى
بردان أنا بردان
والدم مطلوبى
يا سدر محبوبى
داخل أنا عندك
قاطف زهور شهديك
ومكفك بيدي
دى الليلة دى عيدي
والتربة عندى أمان .

(ويختفى كما ظهر فجأة . لكن الطبول تستمر . تظهر
عزيزة من وراء التعريشة وهي ترتعد ..)

عزيزة : أنا خايفه قوى ؟ ايه الصوت ده ؟ ده مش صوت بنى آدم .
ياترى انت فىن يا يوسف دلوقت ؟ واحنا صغيرين كنت دايما
آجى ألاقك مستنيني اشمعنى المرة دى ؟! تكون نسيت ؟!
(لنفسها بحسرة) ضرورى نسي المكان . ما هو كبر واتجوز
وخلف . ضرورى ينسى لعب العيال بتاع زمان (يسمع
عواء ذئب) ايه ده ؟ ديب بيعوى ؟! زمان ماكانش فيه ديابة .
أنا خايفة قوى . لازم أروح .. لا لازم أسكتنى . ضرورى
حيجى . على الأقل علشان الجواب . ما هو ضرورى جيعرف
ان الجواب وقع منه وأنا لقينته وجيت على هنا . طول عمره
نبيه .. ولو انه ما اتعلمش (يقترب عواء الذئب فتغدد تختفى
داخل التعريشة)

(بعد قليل تظهر آسيا ومغها عيشة والمغنواتى قادمين من
بداية الطريق بجوار الترعة)

آسيا : مافيش حد هنا يامغنواتى !

المغنواتى : صبرك شوية ياست . أنا شايفه بعنيا دول ماشى فى
السكة دى . هو نزل سى راجى قدام البيت من هنا والحصان
بتاعه برك ما قامش والدم مغرقه . راح سايبه راخر وماشى
على رجليه . بس كان ماشى يتطوح زى السكران والدم نازل
من نافوخه راخر .

عيشة : يعنى أنا لو كنت رجعت كوم الدكة كان زمانى قاعدة غلبانة
جنب أمه ولا عارفة حاجة . . وهو داير مع الفاجرة بعد ماقتل
عريسها . بس الحمد لله الى خلانى أجى لك . حاجة قالت
لى لازم تروحي للست آسيا . وآدينى جيت لك وعرفت الى
حصل . وآدينى كمان جيت معاكى عشان همى وهمك يخلصوا
مع بعض فى ساعة واحدة .

آسيا : روح انت يامغنواتى أقف عند الترعة . وان شفته . . شاور
لى بالعصبة دى (تعطيه عصابة من القماش ملوثة بالدم)

المغنواتى : حاضر . (ويبتعد عنهما)

آسيا : شفتى يا عيشة . قرايى ما طلعتش فيهم راجل . ماصدقوا
ان ابنى راح وكل واحد قال لروحه بركة يا جامع . كلهم هربوا
على بيوتهم زى النسوان وكل واحد فيهم اطمئن انه حيورث
حتة من غيط العنب . شفتى الكلاب ؟! لولا المغنواتى كان
زماننا قاعدين نلطم زى المجانين من غير حيلة .

عيشة : طب مش يمكن المغنواتى ده راخر بيتوهنا ؟

آسيا : لا . أصله مش متعود يكذب . كمان هوه كان بيحب راجي
من قلبه .

عيشة : (تولول) ياميت خسارة عليك ياخويا . ياميت خسارة على
شبابك

آسيا : بس ! مش عاوزه نواج دلوقت . الى حصل ماينفعش معاه
نكا . ده عاوز حاجة واحده . . وأنا الى حاعملها

(على حدود الترفة . . يقترب المتاوى من المغنواى فتهمس
آسيا)

آسيا : آهو . آهو ظهر . ده بيكلم المغنواى .

عيشة : لا . مش هوه . . الثانى طويل عن كده .

آسيا : آمال ده يبقى مين ؟

عيشة : دول قعدوا لاتنين على الترفة .

(يبدأ الرجلان الترتيل بالتبادل مع ارتهاق دقات الطبول)

التاوى : الكفن جاهز

وميه التفسيل . . باردة

المغنواى : بتنعش الميتين .

التاوى : زى العصافير . . كلهم جوه ايدى

المغنواى : وايدى صياد محترف

التاوى : من رقابهم . . سكينتى طالعة من رقابهم حرف

المغنواى : زى القمر لما يطلع من سحب اسود

التاوى : يطرطشوا بالدم

أشرب واشرب واشرب من عروق النصف

يدخل عصير الحياة
مابين شفايفي الرخام
أشرب عصير السكات
واسرح مع الأوهام
المغنواتي : ده الحب يا ميتين

عا الجبل متعلق
بين الجبل والجبل
المتاوى : والحبل يا سكرانين
بتقرقضه سناني
يقع كلامكم هنا
ما تسمعه وداني
ما يرق له قلبي
ما تلمحه عيني

المغنواتي : عيني يا ليلي آه ، وآه ياليل ياعين (ينسحب المتاوى بعيدا)

(المرأتان تتبادلان مكانيهما بعد أن كانتا قد تجمدتا تماما)

آسيا : ايه ؟! خفتي ؟!

عيشة : (ترتعد بشدة) شوية

آسيا : ان كنتي عاوزة ترجعي .. ارجعي

عيشة : لا أنا حا استنى معاكى .. بس ..

آسيا : بس ايه ؟

عيشة : مش باين عليه حايجي من الناحية دي

آسيا : لا حاييجى • المغنواى شافه
عيشة : طب ما يمكن يكون عدى الكوم ده
آسيا : حيروح فين بعد كده ؟ مافيش غير الطينة
عيشة : (تصيح) الله ! ده المغنواى بيشاور بالعصبة
آسيا : (متهللة بفحيح) يبقى وصل •
(المغنواى ومعه المتاوى ينزلان الى أسفل الترة حتى يختفيا •
يسمع عواء الذئب • يظهر يوسف مقتربا وهو يترنج فى
مشيته ممسكا برأسه فتتهف آسيا بفرحة طاغية)
آسيا : آهو • آهو • آهو • آهو • هو • هو •
عيشة : (تجز على اسنانها) أيوه هو •
يوسف : (مقتربا مناديا بصوت ضعيف) عزيزة • عزيزة •
عيشة : (بذهول) ده بينادى عليها • تبقى هيه هنا • آه • يبقوا
مواعدين بعض هنا (ترتعش) هاتى الطبنجة
آسيا : (بحزم) لا • ده يخصنى أنا
عيشة : وأنا كمان
آسيا : أنا ليا فيه أكثر منك •
عيشة : أبوس ايديكى
آسيا : (يوسف اقترب جدا فتدفع آسيا عيشة بقسوة بعيدا
وتخرج الطبنجة تصوبها نحوه) جيت لقضاك يا ابن حجازى
يوسف : (متفرسا فيها وبصعوبة يعرفها) مين ؟ مرات عمى ؟
آسيا : (بصوت رهيب) أيوه مرات عمك • عمك الى أبوك قتله •
وقولى كمان يا ام راجى • راجى الى انت قتلته

يوسف : أنا ؟ أنا ماقتلتوش . استنى عليا لما أفهمك
عيشة : تفهمها ايه يامجرم ؟ دى مش عيشة الى قعدت تضحك عليها .
دى آسيا الى حتموتك دلوقت آهو .
يوسف : اذا كنتم عاوزين تموتوني زى بعضه . بس استنوا لما ألاقى
عزيزة الأول .
آسيا : عزيزة حتحصلك دلوقت حالا . خد
(وتطلق عليه النار فيسقط مضرجا يدمائه فيهتف هو بصوت
متحشرج)
يوسف : ال . . . جواب . . . مع ع . . . زيزة . اديه للشيخ . . . للشيخ
سليمان يا عيشة
(يموت . فى الوقت الذى تخرج فيه عزيزة من التعريشة
مفروعة وعليها آثار النوم . ترى المشهد فتصرخ من قلبها وهى
تعدو نحوه)
عزيزة : يوسف (وترتمى على الجنة)
آسيا : عاوزه تحصليه يا فاجرة .
(صوت سليمان ينادى من بعيد : يوسف ، عزيزة . . .)
عيشة : (ترتمى على أقدام آسيا) أبوس ايديكى . أبوس رجليكى .
ادينى الطبنجة أبوس جزمته
آسيا : (تعطىها الطبنجة بنشوة) خدى جزاة ماجيتى معايا . خدى
حقك منها .
عيشة : بصى لى يا عزيزة (تصرخ بجنون) قومي من عليه . ده مش
بتاعك . ده بتاعى أنا
سليمان : (خارج الكادر مقتربا) يوسف . . . عزيزة

عزيزة : (تواجه عيشة وهي تبكي بحرقة) اضربى .. اضربى
يا عيشة

عيشة : (وهي تصوب نحوها الطبنجة) ابعدى عنه الأول .
عزيزة : لا مش حا ابعده . اضربى زى ما انتى عاوزة . انتى غلطانة ..
أنا ما كنتش حاآخده منك زى ما انتى فاكرة .

عيشة : ابعدى عنه
عزيزة : (تصرخ) لا . هوه كان من حقك طول ما هو عايش .
دلوقت بقى من حقى أنا .

عيشة : (بهستيرية) ابعدى باقول لك يا فاجرة
(يدخل الشيخ سليمان لاهنا فتبادره آسيا قائلة بفحيح)

آسيا : قتلت الى قتل ابنى
سليمان : (ينقل بصره مذعورا بين الجميع) ايه ؟ فيه ايه ؟
عزيزة : اضربى يا عيشة

سليمان : استنى ياولية انتى يامجنونة
عيشة : استنى ايه بعد ده كله ؟ دى مش عاوزة تسببه حتى وهوه
ميت . يبقى لازم تموت معاه . (تطلق النار . ترتدى عزيزة
فوق يوسف . يهرع اليها الشيخ سليمان فتقنول هى له
بصوت ممزق)

عزيزة : ال .. جواب .. الى كنت عاوزة .. وقع من يوسف ..
و .. أنا ل .. لقيته .

سليمان : فين ؟ هوه فين ؟ قوليلي قوام الله يستر عرضك
عزيزة : هوه .. فيه .. حاجة مهمة ب .. بصحيح ؟
سليمان : مهمة قوى قوى ولازم يوصل الليلة

عزيزة : (تمد يدها بصعوبة الى صدرها تخرج الخطاب) آهو . الحق
بقي . . وصله (تموت . يتأمل هو الخطاب وقد تلوث كله
بدمها المتفجر من صدرها)

سليمان : الحق أوصله ؟! أوصله ازاى بعد ما بقي كله دم ؟ الامضا
بقت كلها دم ؟! (وينهار باكيا وهو يردد قائلا لآسيا) فأكرة
ياخاله لما قللتى الى دخل فى دماغك دخل بايه ؟! بالدم !
وقلنتى انه مش حيطلع الا بالدم . دلوقت بقي لازم يطلع
من دماغك ان يوسف هوه الى قتل ابنك . لازم يطلع من
دماغك الغلط كله . يوسف ماخطفش عزيزة ولا قتل راجى
(ولعيشة) وعزيزة ماراحتش معاه علشان يتجوزها
ياعيشة . سامعانى يام سيد ؟ (ويبكى بحرقة) دول الاتنين
كانوا بيدوروا على حال البلد . يمين الله كانوا بيدوروا على
حال البلد . يمين اتعاسب عليه يوم القيامة (ويضع الخطاب
أمام وجه آسيا هاتفا) الجواب ده جاى من عرابى باشا .
وهو ده الى خلاهم يجروا ورا بعض . بصى عليه كويس .
راجى ابنك قتله الأجنبى . . لسه برضه حتقوليل مالنا
ومال الأجانب ؟! لسه يام راجى ؟

آسيا : (تنسحب ذاهلة الى أقصى المسرح الى حيث أسقطت عيشة
الطنبجة فتلتقطها) أنا كنت شارياكى ليه ؟ مش علشان
أحمى بيكى ابنى وأحمى بيكى نفسى (تكتشف أنها لأول
مرة ذكرت ابنها أولا فتكرر) أيوه علشان أحمى بيكى ابنى
وأحمى بيكى نفسى . بس انتى ماقدريتش تحمى الولد .
أصلك ماكنتيش معاه . الخواجة استفرس فيه علشان
ماكنتيش معاه . بس انتى تقدرى تحمينى أنا . أنا أمك
وانتى الى تقدرى تنجينى من النار الى قايده فى دماغى .
ياللا حبيبتى . ياللا ورينى تقدرى تريجينى ازاى

سليمان : (يعدو نحوها صاخرا) ايه ؟ ناوية تعملى ايه
يا مجنونة ؟ (لكنها كانت قد اطلقت النار على رأسها
وسقطت ميتة) (عيشة تطلق صرخة عالية وتعدو ناحية
الترعة تلقى نفسها فيها) (الشيخ سليمان يدور ملسوعا
هنا وهناك صائحا) انتى كمان ؟ وانتى ؟ ايه ؟ ناقص مين ؟
ناقص مين فيكم ؟ ناقص مين ؟

(تظهر فهيمة تقود دسوقى المنهار تماما أما هى فتسير
كالمنومة)

فهيمة : امسك نفسك يا دسوقى . هيه دى الحقة اللى شفتها فى
الحلم .

دسوقى : هوه حصل ايه ؟ حصل ايه غلط ؟ أنا غلطت فى ايه ؟
غلطت فى ايه عشان ترعيبنى بكلامك ده ؟ ماتفهيمنى
يا فهيمة *

فهيمة : ده مصطفى جه آهو من الكنال . المية جابته فى الترعة .
ما هو البحر منفذ على الترعة برضه . لا . لا . وكمات ريحته
جايه مع التراب اللى فى الجو . شامم يا دسوقى ؟ شامم
ريحته فى التراب . لا . لا . ده هوه ذاته جه آهو . شايفه
يا دسوقى ؟ آهو جاي يصالحك . انت كمان لازم تصالحه بقى
وتخلينى أروح معاه . آهو شوف نايم جنب يوسف وعزيزة
(دسوقى يعدو نحو الشابين مذعورا)

دسوقى : عزيزة !؟ عزيزة ماتت !؟ بنتى ماتت !؟ بنتى !؟
عزيزة !! ماتت !؟

فهيمة : لا . دى نايمة بس . ومعاهها يوسف . . مصطفى

دسوقي : (ينهار تباراً) ؟ عزيزة نايمة ؟ ! ويوسف نايم ؟ !
ومصطفى نايم جنبهم ؟ ! أمال مين الى صاحي ؟ ! أنا ؟ ! طب
أنا صاحي ولا أنا بحلم ؟ ! أنا شاييف ذه قدامي ولا أنا
غلطان ؟ غلطت أنا في آيه ؟ معقول واحد زبي يعيش طول
عمره مش عارف آيه الصبح وآيه الغلط ؟ ! (يقفز كالمطمعون)
ما هو أنا لازم أعرف دلوقت حالا أنا الى غلطت ولا ابويا
الى قسم فلوسه غلط ؟ أنا الى غلطت ولا عثمان الى طمع في
فلوسي وأنا سكت له ؟ أنا الى غلطت ولا حجازي الى قتل
أخوه ؟ أنا الى سكت ولا فهيمة الى اتكلمت لغاية ما اتجننت .
أنا العاقل ولا أنا المجنون ؟ أنا لازم أفهم كل حاجة دلوقت
حالا (فجأة يضع يده على قلبه متأوها) آه

فهيمة : دسوقي .. أخويا (لكنه يسقط على الأرض دون حراك)
انت كمان نمت . كلكم نمتم وسايبنى أنا وحدي صاحية .
طب ما أنا برضه عاوزة أنا (تقترب من عزيزة ويوسف)
وسعى لي يا عزيزة انت يوسف . خدني جنبك يا مصطفى ..
أنا عاوزة أناام بقي (وترقد بجانب الشابين)

سليمان : (وحده على المسرح) ناقص مين يابلد ؟ مين الى حيسكنك
يا اسكندرية ؟ آيه الى عملتيه في عيالك ؟ ! ده انتي حتدفعي
التمن غالي يامسكينة . بكرة الأجانب يسكنوا في لحملك .
دول حيركبوا الحناطير ومحدث حيقول لهم لا . وحيأخدوا غيط
العنب وفوق منه غيط البلع وغيظ الغلة وغيظ القطن ..
دول حيفرطوا الرمان وحيدوسوا على هدموم الفرع ويعكروا
مية النيل الى جاي من غسل الجنة (وينهار باكياً)

التناوي : (داخلا من جانب المسرح) الكفن جاهز . ومية التفسيريل
باردة بتنعش الميتين (يدخل المفنواوي من الجانب الآخر مردداً)

المفنواقي : زى العصافير • كلهم جوه ايدى • وايدى صياد محترف
سليمان : لازم الصوت يسكت • الصوت ده لازم يسكت • ولو بعد
ميت سنة لازم حد يقول له يسكت • لازم يسكت

(مع نزول الستار يسمع صوت يغنى من بعيد)

الصوت : شفت الحبيبة اندهلت

ولمست طرحتها

دى اسكندرية يا ناس

الليلة دخلتها

دى اسكندرية يا ناس

الليلة دخلتها

ختم

مسرجات الشاعر

★ سفينة نوح الضائفة	١٩٦٤	الناشر المجلس الأعلى للفنون
★ الحلم الطروادى	١٩٦٦	الناشر دار لوران
★ الملك لير	١٩٧٨	الناشر دار الوادى
★ ريم على الدم	١٩٨٠	الناشر دار الوادى
★ ليلة زفاف الكترا	١٩٨١	الناشر المؤلف
★ السلطانة هند	١٩٨٥	الناشر اتحاد الكتاب المصريين ودار لوران

مطابع الهيئة المصرية العامة للكتاب

رقم الابداع بدار الكتب ١٩٨٥/٥١٤٤

ISBN - ٩٧٧ - ٠١ - ٠٧٠١ - ٨